

To'on yó'o kí'án nì taa San Pablo nì sa'an noó nà ñoo Roma

Ká'an Pablo ndisá'án

1 ¹ Yu'u kúú Pablo, ta kéchóoin noo Jesucristo, ta nì nakana na yu'u kakuui iin apóstol, chí nì taó xóo na yu'u ña kanooi kasto'in xí'ín ñayuu sa'á to'on va'a Ndios. ² Ta to'on yó'o kí'án ña nì ka'an Ndios kee na nda rá sa na'á, ta profeta na nì taa naan noo tuti ij mií ná.

³ Ta to'on va'a yó'o ká'an sa'á de'e na Jesucristo, na kúú sato'o yo. Nì kii na tein na ve'e rey David, sa'á ñoo nì kaki na kúú ná iin taa. ⁴ Ta xí'ín ndée mií Espíritu ij Ndios nì na'a ña Jesús kúú de'e Ndios, chí nì danátaki ñaá ná tein na nì xi'i. ⁵ Ta sa'a Jesús nì ni'i ndú ña manì ña kakuu ndu apóstol, dá kane'e ndu to'on na noó ñayuu ndéi iin ní kúú ñayuú yó'o, dá natiin kuú ná ñañó'ó sa'á ña kandeé iní ñaá ná, ta kueídó'o ñaá ná. ⁶ Ta tein ñayuu ñoo ñó'o ta'ani ndo'ó, chí nì nakana Ndios ndo'ó ña kakuu ndó kuendá Jesucristo.

⁷ Ta ká'an yu'u ndisá'án xí'ín ndo'ó, na ndéi ñoo Roma, na kú'u ini Ndios sa'a, na nì nakana na kakuu ñayuu mií ná. Ta mií tatá yo Ndios xí'ín sato'o yo Jesucristo ná kee ña manì xí'ín ndó, ta naki'o na ña ná koo va'a ini ndo.

Kóni Pablo ko'on na korni'ini na ñayuu ndéi ñoo Roma

⁸ Ta dinñó'ó ka náki'oi ndivé'e noo Ndios xí'ín kuú Jesucristo sa'a iin rá iin ndó, dá chí sa iin ní kúú vá ñayuú ní'i tó'on na ña kándée iní ndo Jesús. ⁹ Ta noo mií Ndios kéchóoin xí'ín ndino'o inii dána'i to'on va'a ña ká'an sa'á de'e na, ta noón kúú na xí'o ndaa kuendá sa'í, ña daá kuití vá xíkaj ña manì noo ná sa'a ndo. ¹⁰ Ta noo ká'in xí'ín ná, seí nda'íi noo ná ña tá kóni mií ná, dá ná saai korni'inii ndo'ó. ¹¹ Dá chí kónii saai kande'í ndo'ó, ta chindeéi ndo'ó, dá ni'i ndo ña va'a noo Espíritu ij Ndios, dá kandita toon cháa ka ndo xí'ín ña ndaa kándisa yó, ¹² dá ná naki'o tá'an yó tandeé iní noo iin rá iin yó noó ña ndaa kándisa yó, chí iin nóo kúú vá ña kándisa yó.

¹³ Ñani miíi, kónii ña kana'á ndó ña sa kua'á nda'o ta'ándá nì ka'ín saai kande'í ndo'ó, tído nda viti ió ña'a chítuu yu'u ña saai. Chí kónii kee iin choon va'a tein mií ndó táto'on k'i'o nì kee tein dao ka na ko kúú na Israel.

¹⁴ Dá chí miían ndúsa kánian dána'i noó ñayuu ká'an yú'u griego, xí'ín noo na ko ká'an yú'u griego, xí'ín na ndichí, xí'ín na ko ndichí. ¹⁵ Sa'á ñoo kóni kíi saai kasto'in xí'ín ndo'ó, na ndéi ñoo Roma xaan, sa'á to'on va'a Jesús.

Kándoo vii yo noo Ndios sa'á ña kándée ini yo Jesús

¹⁶ Ta ko xíka'an nooí ká'in sa'á to'on va'a ña ká'an sa'a Jesús, dá chi xí'in to'on yó'o dákaki Ndios ndidaá kúu ñayuu kándisa ñaá. Ta dinñó'o noo na Israel ni kasáa to'on va'a yó'o. Ta ni kasandaá ta'anian noo na ko kúu na Israel. ¹⁷ Dá chi to'on va'a yó'o ká'an sa'a ndí kián kee yó, dá kandoo vii yo noo Ndios, chi kándoo vii yo noo ná sa'á iin tó'on dini ña kándée ini yo Jesús. Dá chi di'a kaá tuti ií mií Ndios: “Na ni kandoo vií noo Ndios sa'á ña kándée ini ñaá ná, noón kúu na kataki chíchí.”

Ká'an Pablo ña ndidaá ñayuu kómí kuachi noo Ndios

¹⁸ Ta ña xido ini Ndios kii nda induú sata ndidaá kúu ñayuu kée ña kini, xí'in na xixi ini, chi xí'in ña kini kée na chítuu na ña ndaa sa'a Ndios. ¹⁹ Ta ña kánian kana'á ná sa'a Ndios, sa ná'á vá ná ña, dá chi mií Ndios ni xi'o ña ni kandaá ini na sa'an. ²⁰ Ta va'ará o kúu ta'on koni yo choon ká'ano né'e na xí'in noo yo, ta va'ará o kúu ta'on koni yo ña kúu ná Ndios, tído kánian kana'á yó ña miían ndaa ió na, ta né'e na choon, chi nda rá ni kasá'á sa'a ñayuu yó'o xí'o na ña kandaá ini yo ña dión kián, chi xiní yo ndidaá kúu ña ni kava'a na. Sa'á ñoó ni iin tó'on ñayuu o kúu kaa ña ko ná'á ná sa'a Ndios.

²¹ Ta va'ará ná'á ná ña ió Ndios, tído ko ndáño'o ta'on ñaá ná táto'on ki'o kánian kee na, ta ni ko náki'o na ndivé'e noo ná. Di'a xini ndi kuú vá ña'a ko choon nákani ini na, ta ni ndukaxí nio ná, chi ni nakuin naá vá ñaxintóni ná. ²² Kée na mií ná ña kúu ná ñayuu ndichí, tído ni nduxixi di'a na, ²³ chi ni dankoo na ña keká'ano Ndios, na ió kuií. Dá ni kasá'á keká'ano na na'ána taa, tá'an ra xí'i, xí'in na'ána laa, xí'in na'ána kirí komi sa'a, xí'in na'ána kirí xíka tii.

²⁴ Sa'á ñoó ni naki'o ñaá Ndios noo ndidaá kúu ña kini, tá'an ña kátoó téi ñayuu ñoó kee na. Sa'á ñoó ndéi iin rá iin na kée na ña ka'an noo xí'in ñii ná. ²⁵ Ta ni dankoo na ña ndaa sa'a Ndios, ta ni kándisa na ña to'on, chi xí'o na ñañó'o, ta ndáño'o na ña ni kava'a Ndios, ta ko ndáño'o na mií Ndios, na ni kava'a ndidaá kúu ña'a, na daá kuití kánian natiin ñañó'o. Dión ná koo.

²⁶ Ta sa'á ña kée ñayuu ña kini ñoó, sa'á ñoó ni naki'o ñaá Ndios noo kuachi ka'an noo. Chi nda na ña'a ni dankoo táto'on ki'o ni saki Ndios ña naki'in tá'an na xí'in iin taa kandeí na. Di'a ni naki'in tá'an daá ña'a mií ná ndéi na kée na kuachi ka'an noo. ²⁷ Ta dión ta'ani kée dao taa, chi ni dankoo ta'ani ra táto'on ki'o ni saki Ndios naki'in tá'an ra xí'in iin ña'a kandeí na. Dá ni kasá'á kátoó xixi ra kudi ra xí'in taa xí'in rá, chi yá'a ra kée ra kuachi ka'an noo xí'in daá taa mií rá. Sa'á ñoó ní'i tá'i rá ña ndo'o naní nio rá sa'á kuachi kée ra.

²⁸ Ta sa'á ña ko ní xín na taó kuendá na Ndios, sa'á ñoó ni naki'o ñaá Ndios noo ndidaá kúu ña kini nákani ini ñaxintóni ná, dá ná kee na ña

ko kánian kee na. ²⁹ Chi ni nakutí ná ñó'o ndidaá kúú ña'a ko vá'a, ta kée na kuachi ka'an noo xí'ín ndi ndáa mií vá ñayuu, ta saá ini na, ta kátoó nda'o na kakomí ná ña kuiká, ta kée na ña kini xí'ín dao ka ñayuu, ta u'u ini na, ta sa'ání na ndii, ta dánaá na dao ka ñayuu, ta dánda'í na ñayuu, ta chínaní kini na dao ka ñayuu, ³⁰ ta ká'an u'u na sa'a dao ka na, ta káva'a na kuachi sa'a ñayuu, ta xiní u'u na Ndios, ta koó ñañó'ó ná noo ñayuu xí'ín ná, ta ká'an ná ña kúú ná ñayuu ndaya'i, ta ió táyíí ini na, ta ndúkú ná kee na ña kini saá, ta ko seídó'o na tatá na xí'ín naná na, ³¹ ta kúú ná ñayuu ndeé to'on, ta ko kée na to'on ká'an na, ta ko kú'u ini na sa'a ni iin ñayuu, ta ko ió nda'í ví ini na xí'ín dao ka ñayuu, ta koó ña xí'o ká'ano ini noo ná. ³² Ta sa kándaá ini ñayuu ñoó sa'a choon ni sa'anda Ndios, ta kándaá ta'ani ini na ña ñayuu kée dión kánian kuu. Tído yá'a ij vá mií ná kée na ña kini ñoó, ta kádi iní na tá kée dao ka ñayuu ña kini ñoó.

Kéyíko ndaa Ndios sa'a ndidaá kúú ñayuu

2 ¹ Ni iin tó'ón ña maní o koo sa'a ndo'ó tá dátaí kuachi ndó dao ka ñayuu. Ko né'e tandíni ndá yoo kúú ndo'ó, dá chi tá dátaí kuachi ndó dao ka ñayuu, dá kían dátaí kuachi ndó mií vá ndó, chi dión ta'ani yá'a mií ndó. ² Ta sa ná'á vá yó ña kéyíko ndaa Ndios tá dándó'o na nío ñayuu kée dión. ³ Ta nakani va'a ini ndo, chi dátaí kuachi ndó dao ka ñayuu, tído ki'o dión ta'ani yá'a mií ndó. ¿Á ká'an ndó ña kaki ndó noo keyíko Ndios sa'a ndo? ⁴ O sa kú'ichi ini ndo koni ndo ña va'a kée Ndios, chi va'a nda'o ini na, ta ndáti na, ta kueé ió ini na. ¿Á ko ná'á ta'on ndó ña va'a nda'o ini na, chi kóni na ña nandikó iní ndo sa'a kuachi kée ndó? ⁵ Tído sa'a ña kúú ndó ñayuu saá ini, ta sa'a ña ko kóni ndo nandikó ini ndo sa'a kuachi kée ndó, sa'a ñoó ndukua'á ka ví tandó'ó ndo'o ndó tá ná kasandaá ku kasaa Ndios keyíko ndaa na sa'a ndidaá ñayuu, ⁶ chi chiya'i na noo iin rá iin ñayuu táto'on káa ña ni kee na. ⁷ Ta ko'on na ki'o na ña kataki chíchí ñayuu ndí'i ini kée ña va'a, chi ni ndukú ná ñañó'ó noo Ndios, ta ni ndukú ná ña ka'an va'a Ndios sa'a ná, ta ni ndukú ná ña kandeí chíchí ná. ⁸ Tído dándó'o Ndios nío ñayuu dí'inda sa'a ña xido ini na xiní ñaá ná, ta dión ta'ani kee na xí'ín na ko seídó'o ña ndaa, chi ndíko cháá ka na ña ko kían ndaa. ⁹ Ndo'o naní nío ndidaá ñayuu kée ña kini kuú dáá ñoó. Ta dinñó'ó ka na Israel ndo'o dión, ndí'i daá, dión ta'ani ndo'o nío na ko kúú na Israel. ¹⁰ Tído na kée ña va'a natiin na ñañó'ó noo Ndios, ta va'a ka'an Ndios sa'a ná, ta ni'i ná ña koo va'a ini na. Dinñó'ó ka na Israel natiin ña va'a yó'o, ndí'i, dá natiin na ko kúú na Israel ña. ¹¹ Dá chi ni iin ñayuu ko máni cháá ka noo Ndios, chi iin nóo kúú vá ná noo ná.

¹² Ta ndi ndáa na ko ná'á ley Moisés, ta ni ya'a na ni kee na kuachi, noón kúú na ná sa'a kuachi kée na, va'ará ko ná'á ná ley ñoó. Tído ndidaá na kómí ley yó'o yá'a ta'ani na kée na kuachi, sa'a ñoó keyíko

sa'a ná táto'on kī'o dándáki mií ley. ¹³ Chī o kándoo vii ta'on ni iin ñayuu noo Ndios sa'á ña seídó'o oon na choon sa'ándá ley. Sava'a na kée choon sa'ándáan, noón kúu na kandoo vii noo Ndios. ¹⁴ Tído na ko kúu na Israel, ko kómí ná ley ni xī'o Ndios noo Moisés. Tído tá kée na dao choon sa'ándá ley Moisés xí'ín ña nákaní ini na, dá kían ná'a na ña ió ta'ani iin ley noo ná, va'ará ko ná'a ná mií ley Moisés. ¹⁵ Ta xí'ín ña kée na ná'a na ña ió iin ley ní'o ná, ta ñoo kían kedaá xí'ín ná, dá kandaá ini na á ni kee na ña va'a o koó. Sa'á ñoo ley nákaa ini ñaxintóni ná dátaí kuachi ñaá, ta ñoo ta'ani chindeé ñaá ¹⁶ tá ná kasandaá kuu keyíko Ndios sa'á ñayuu xí'ín ndá'a Jesús, chī keyíko na sa'a ndidaá kúu ña'a ni kede'é ñayuu táto'on kī'o kua'an to'on va'a sa'a Jesús, ña ni daná'i noo ndo.

Ko seídó'o ta'on na Israel ley Ndios, kaá Pablo

¹⁷ Ta ndo'ó, chínaní ndó mií ndó ña kúu ndó na Israel, ta kándéé ká'ano ini ndo ley Moisés. Ta chíndaya'i ndó mií ndó ña kúu ndó na ñoo Ndios. ¹⁸ Ta kaá ndo ña ná'a ndó ndí kían kóni Ndios kee ndó, ta kaá ndo ña dána'a ley ñoo noo ndo ndí kían va'a kánian kee ndó. ¹⁹ Ta ká'an ndó ña tī'a ndó tiin ndaa ndo na ko túu noo, chī ká'an ndó ña kúu ndó iin ña tóon noo ñayuu ko ná'a Ndios. ²⁰ Ta kaá ndo ña tī'a ndó dána'a ndo noo na ko kátóni iní, ta tī'a ta'ani ndó dána'a ndo noo na ko ná'a táto'on kī'o kée ndó xí'ín takuálí. Ta kaá ndo ña noo ley kómí ndó ndidaá ña ndichí xí'ín ña ndaa sa'a Ndios. ²¹ Tī'a va'a ndó dána'a ndo noo dao ka ñayuu, sa'á ñoo, ñndiva'a ko tí'a ndó dána'a ndo noo mí ndó, tá dáá? Dá chī dána'a ndo ña ko kánian kí'in kuí'íná ná. Ta, ñndiva'a kí'in kuí'íná ií ri mí ndó? ²² Ta dána'a ndo ña ko kánian ya'a na kee na kuachi xí'ín na ko kúu yí ná o ñadi'í na. Ta, ñndiva'a kée ií ri mí ndó dión? Tá mífan ndaa ndisa káñó'ó ndó yokó, ñndiva'a koku'u ndó ini ve'e ño'an, ta kí'in kuí'íná ndó ña kuiká ñó'o inian? ²³ Kúryíí nda'o ndó sa'á ña kómí ndó ley Ndios, sa'á ñoo, ñndiva'a kandaá ndo ñaño'ó Ndios sa'á ña ko seídó'o ndó choon sa'ándáan? ²⁴ Ta ndaa va ká'an tuti ií Ndios, chī di'a kaáan: “Ká'an ndava'a na ko kúu na Israel sa'a Ndios kée ndo'ó.”

²⁵ Mífan ndaa ndaya'i ña ni ta'anda ñíi ndo tá seídó'o ndo'ó choon sa'ándá Ndios. Tído tá ko seídó'o ndó choon sa'ándá Ndios, dá kían kúu ndó táto'on ñayuu ko ní ta'anda ñíi. ²⁶ Tído ñayuu ko ní ta'anda ñíi, xían nani kée na choon sa'ándá ley Ndios, noón di'a kúu ñayuu Ndios, va'ará ko ní ta'anda ñíi ná. ²⁷ Chī tá seídó'o ñayuu ko ní ta'anda ñíi choon sa'ándá Ndios, ña yó'o xí'o ña kandaá ini ndo ña kánian dándó'o Ndios ní'o ndo, dá chī va'ará kómí ndó ley Moisés, ta ni ta'anda ñíi ndo, tído yá'a ndó noo choon sa'ándá ley ñoo. ²⁸ Dá chī ko kúu yó na Israel ndisa sa'á ña ni ta'anda ñíi yo, chī o duú ñíi yo kedaá xí'á, dá kúuó na ñoo Ndios. ²⁹ Dá chī ñayuu mífan ndaa kuiti kúu na Israel, noón kúu na

ndino'o iní na seídó'o na Ndios. Ta nío na kían ná'a ña kúú ná ñayuu Ndios, chī ndino'o ini espíritu ná kándísa ñaá ná, ta kō kándéé ini na ley. Ta náta'an ini Ndios xiní na ñayuu kée dión, va'ará kō náta'an ini ñayuu xiní ñaá ná.

3 ¹ Ta, ¿á iin ña ndáya'i kían ña kúú yó na Israel? Ta, ¿á iin ña ndáya'i kían ña ni ta'anda ñíi yo viti? ² Jaan, ña ndáya'i nda'o kían, chī chindeé nda'o ña yo. Ta mií ña ndáya'i cháa ka kían ni xi'o Ndios to'on na noo yo, na Israel. ³ Tído, ¿ndi koo viti, chī dao na ñoo yo kō ní seídó'o ta'on na choon ni sa'anda Ndios noo ná? ¿Á ña yó'o kóni kaa ña dánkoo ta'ani Ndios to'on ni xi'o na noo yo? ⁴ Koó, kō ta'ón dión kían. Di'a iin toon Ndios xí'ín ña ni kaa na kee na, va'ará ndidaá ñayuu ni kandoo kúú ná na to'ón, chī di'a kaá tuti iñ Ndios:

Ndidaá ñayuu kandaá ini ña kée ní táto'on ki'o ni ka'an ní kee ní, sa'á ñoó tá ná ka'an kuáchi na sa'a ní, dá kían kandoo ní kakuu ní na ni kandeé.

⁵ ¿Ndi ká'án ndo'ó viti? Tá kuáchi yó kedaá xí'ín dao ka ñayuu, dá kandaá ini na ña iin ndaa Ndios xí'ín to'on ni xi'o na noo yo, ¿á ña yó'o kóni kaa ña kō kánian dándó'o Ndios nío yo? Koó, dá chī dión nákanii ini ña ñayuu yó'o. ⁶ Tído kō ta'ón dión kían, dá chī tá ná o dándó'o Ndios nío yo sa'á ña kini kée yó, dá kían, ¿ndi koo keyíko ndaa na sa'a dao ka ñayuu ndéi ñayuu yó'o, tá dáá? ⁷ Tído, tá kuáchi kée ndu kían kedaá, dá ná'a ña iin ndaa Ndios xí'ín to'on ni xi'o na, ta nátiin na ñaño'ó noo dao ka ñayuu, ¿ndiva'a dándó'o na nío ndú sa'á kuáchi kée ndu, tá dáá?, kaá dao ndó. ⁸ Tá dión kían, dá kían, ¿á kaa yo ña kuu kee yó ña kini, dá ná natuu ña va'a? Ta kaá dao ñayuu ña dión dána'a ndu, chī kátoó na dátuu ñaá ná, tído miían ndaa ya'i nda'o chiya'i na noo Ndios sa'á ña ká'an na dión.

Ká'an Pablo ña ni iin tó'ón yó kō kúú ñayuu ndaa noo Ndios

⁹ Ta, ¿ndi ká'án yó viti? ¿Á ndáya'i cháa ka yóó, na Israel, o duú na kō kúú na Israel? Koó, kō ta'ón dión kían. Dá chī sa ni nákanii xí'ín ndó ña yóó, na kúú na Israel, xí'ín na kō kúú na Israel, ndidaá vá yó ño'ó tixi ndá'a kuáchi. ¹⁰ Dá chī di'a va kaá tuti iñ Ndios:

Ni iin tó'ón ñayuu kō kúú ñayuu ndaa noo Ndios,
ta ni iin tó'ón ná koó.

¹¹ Ni iin tó'ón ñayuu kō kandaá ini,
ta ni iin tó'ón ñayuu kō nándukú Ndios.

¹² Ndidaá kúú ñayuu ni kankuei xoo noo Ndios,
ta ni nduu na ñayuu kō chóon.

Ta ni iin na kō kée ña va'a,
ta ni iin tó'ón ná koó.

¹³ Táto'on iin yái ndii ña nóno yú'u kúú diko ná,
chī kánkuei ndino'o to'on kini yú'u ná.

Ta xí'ín yáa ná ká'an na ña to'on.

Ta xí'ín to'on ká'an na dárkue'e na ñayuu,
táto'on dárkue'e iin koō iin ñayuu xí'ín ndirá deen ri.

¹⁴ Ta ni chití yú'u ná ñó'o to'on kini xí'ín to'on ova.

¹⁵ Ta kaon kána sa'a ná kua'an na kati na ní ñayuu xí'ín ná.

¹⁶ Ta ndei kúú míí vá noó xionoo na dándó'o na nío ñayuu, ta dánkoo
nda'í ñaá ná.

¹⁷ Ta ko tí'a na kandeí va'a na xí'ín ñayuu xí'ín ná.

¹⁸ Ta ni lú'u ví ko yu'ú ni'ini na Ndios.

¹⁹ Sa'á ñoó sa ná'á vá yó ña ndidaá to'on ña ká'an tuti ii Ndios yó'o,
ká'an xí'ín ndidaá na ñó'o tixi ndá'a mián. Sa'á ñoó ná kadi na Israel
yú'u ná, chi mií ná xí'ín ndidaá ka ni ñayuu ndei ñayuú yó'o nakuíta
noo Ndios iin kuū, dá keyíko sa'á ná. ²⁰ Chi ni iin tó'on ñayuu o kándoo
vii noo Ndios sa'á ña kée na choon sa'ándá ley. Dá chi ni xí'o Ndios ley
na noo yo, dá ná kandaā ini yo ña kúú yó ñayuu kómí kuachi noo ná.

Kándoo vii yo noo Ndios sa'á ña kándéé ini yo Jesús

²¹ Tído viti ná'a Ndios noo yo ña ió iin ka ña'a noo ley, ta ñoó kían
kédaá xí'ín yó, dá kándoo vii yo noo ná. Ta mií ley xí'ín profeta xí'o
ndaā kuendá sa'a ña yó'o, ²² chi dánkoo vii Ndios yo noo mií ná sa'á iin
tó'on diní ña kándéé iní yo Jesucristo. Ta dión kée na xí'ín ndidaá kúú
ñayuu kándísa Jesús. Ta ko taó kuendá ta'on na ndá yoo kúú iin rá iin
ñayuu, ²³ dá chi ndidaá tá'an va na yá'a kée kuachi, sa'á ñoó ni kuxíká
ná noó ña vii kúú Ndios. ²⁴ Tído viti ni ni'í óon yó ña kándoo vii yo noo
ná sa'á ña maní ni kee na sa'a yo, chi ni taó xóo na yó tixi ndá'a kuachi
sa'á ña ni xí'í Cristo Jesús sa'a yo. ²⁵ Chi ni tanda'á ñaá Ndios ni kii na
ni chiya'i na sa'a kuachi yo xí'ín nií ná, ta ni ndoo kuachi yó sa'á ña
kándéé iní yo ná. Ta kí'o dión ná'a na mií ná ña kúú ná iin na ndaa. Ta
sa'á ña kueé ini Ndios, sa'á ñoó ko ní sa'an ta'on na taó kuendá na sa'a
kuachi ni kee ñayuu ni sa ndei sa ná'á. ²⁶ Tído viti ná'a na mií ná ña kúú
ná na ndaa, dá kandaā ini yo ña keyíko ndaa na, ta dánkoo vii ná yó
noo ná sa'á ña kándéé iní yo Jesús.

²⁷ Ta, ¿ndei kua'an ña kúryí ñayuu? Ni naá óon vaan. Ta, ¿ndiva'a ni
naá óoan? Ni naá óon vaan dá chi sa'á iin tó'on diní ña kándéé iní yo
Jesús kándoo vii yo noo Ndios, ta o duú sa'á ña kée yó choon sa'ándá
ley. ²⁸ Ta viti kían kandaā iniyo ña kándoo vii yo noo Ndios sa'á ña
kándéé iní yo Jesús, ta o duú sa'á ña kée yó choon sa'ándá ley. ²⁹ ¿Á
ká'an ndó ña kúú ná iin Ndios dákaki sava'a na Israel? Koó. ¿Á ko ná'á
ta'on ndó ña kúú ta'ani na iin Ndios dákaki na ko kúú na Israel viti? Chi
miían ndaa kúú ta'ani na Ndios noo ná. ³⁰ Dá chi iin tó'on diní vá kúú
Ndios, ta mií ná xí'o ña kándoo vií ñayuu ni ta'anda níi noo ná sa'á ña
kándéé iní na Jesús, ta xí'o ta'ani na ña kándoo vií na ko ní ta'anda níi
noo ná sa'á ña kándéé ta'ani ini na Jesús. ³¹ ¿Á ká'an ndó ña sa'á ña

kándéé iní yō Jesús, ñoó dánkoo xoo yó ley? Koó, chíndaya'i di'a yó ley sa'á ña kándéé iní yō Jesús.

Ni kandoo vii Abraham noo Ndios sa'á ña ni kándisa na to'on ni xi'o Ndios noo ná

4 ¹ Ta viti, ¿ndí kían kaa yō sa'á Abraham, na sa kuu tatá sá'ano yō? ¿Ndi kían ni kandaa ini na sa'a ña yó'o? ² Tá ni kandoo vii Abraham noo Ndios sa'á ña va'a ni kee na, dá kían kuu va kuryíí ná. Tído kō ta'ón dión kían, sa'á ñoó kō ní kúu ta'on kuryíí ná noo Ndios. ³ Chì di'a va ká'an tuti iì Ndios: “Sa'á ña ni kándéé ini Abraham Ndios, sa'á ñoó ni kandoo vii ná noo Ndios.” ⁴ Tá ná kéchóon iin taa noo iin sato'o, kō xí'o oon ta'on sato'o ra di'ón noo rá, chí ña kánian ki'in ya'i ra kían. ⁵ Tído na kō kándéé ini ña va'a kée na, di'a kándisa na iin tó'ón dinì Ndios, na dánkoo ví ñayuu kómí kuachi noo mií ná, noón kúú na kándoo vii noo Ndios sa'á ña kándéé iní ñaá ná. ⁶ Ta dión ta'ani ni kaa rey David ña ndiká'an ndi kúu ví ñayuu kándoo vii noo Ndios sa'á ña kándéé iní ñaá ná, ta o duú sa'á ña va'a kée na. ⁷ Ta di'a ni kaa na: Ndiká'an ndí kúu ví ñayuu, na ni xi'o ká'ano ini Ndios sa'a ña kini kée na,

chì ni dandoo Ndios kuachi na.

⁸ Ndiká'an ndi kúu ví ñayuu, na kō ní kekuendá Ndios sa'á kuachi.

⁹ ¿Á sava'a na ni ta'anda ñií vá ni'í ña ndoo kuachi na noo Ndios, o á ni'ì ta'ani na kō ní ta'anda ñií ña va'a yó'o? ¿Ndi ká'an ndó? Sa ni nakani yu'u xí'ín ndó ña sa'á ña ni kándéé iní Abraham Ndios, sa'á ñoó ni kandoo vii ná noo ná. ¹⁰ Ta, ¿ndá oon ni kandoo vii ná noo Ndios? ¿Á sa dinñó'ó ka ni ta'anda ñií ná, dá ni kandoo vii ná noo Ndios, o kómani vá? Mífan ndaa kuiti kō ñá'a iì vá ta'anda ñií ná, dá ni kandoo vii ná noo Ndios. ¹¹ Ta cháá ka chí noo, dá ni ta'anda ñií ná. Ta ña yó'o ná'a ña ni kandoo vii ná noo Ndios tá o ñá'a ta'anda ñií ná sa'á ña ni kándéé iní na Ndios. Sa'á ñoó Abraham kúú tát'o'on iin tatá noo ndidaá kúú ñayuu kándisa Jesús, va'ará kō ní ta'anda ñií ná, chí sa'á ña kándéé iní ñayuu ñoó Jesús, sa'á ñoó kándoo vii ná noo Ndios. ¹² Ta kúú ta'ani na tatá noo na ni ta'anda ñií. Tído kō kúú ta'on na tatá noo ná sa'á ña ni ta'anda ñií óon ni na. Kúú ná tatá noo ñayuú yó'o tá kándéé ta'ani ini na Ndios tát'o'on kì'o ni kándéé iní ñaá mií ná tá kō ñá'a ta'anda ñií ná.

Ni xi'o Ndios to'on na noo Abraham sa'á ña ni kándéé iní ñaá ná

¹³ Chì kō ní kaá Ndios ña kì'o na iin ní kúú ñayuú yó'o noo Abraham xí'ín noó de'e ñání na sa'á ña ni seídó'o na ley. Di'a ni ni'ì naan chí ni kandoo vii ná noo Ndios sa'á ña ni kándéé iní ñaá ná. ¹⁴ Tá sava'a na seídó'o choon sa'ándá ley ni'í ña ni kaa Ndios kì'o na, dá kían kō chón ta'on ña kándéé ini yō Ndios, ta ni tuú vá ña ni kaa na kì'o na noo yō, ní kúu. ¹⁵ Dá chí sava'a ña ni'ì yō kée ley kúú ña kuido ini Ndios koni na

yó. Tído nà koó ley noo, noón kúú nà ko yá'a ta'on nooán. ¹⁶ Ta sa'á ña kándéé ini yo Ndios, sa'á ñoó ni'i óon yó ña va'a ni kaa nà ki'o na noo yo, dá kían miían ndaa kuiti ni'i ndidaá nà ve'e Abraham ña va'a yó'o. Chi o duú sava'a noó nà kómí ley ni'í ña va'a yó'o, chi ni'i ta'ani ñayuu kándéé ini Ndios táto'on ki'o ni kandeé ini ñaá Abraham ña va'a yó'o. Sa'á ñoó Abraham kúú táto'on iin tatá noo ndidaá yó. ¹⁷ Chi di'a kaá tuti ii Ndios sa'a Abraham: “Ni chikanii yo'ó kakuuón iin tatá noó kua'á nda'o ñayuu.” Ta Ndios, nà ni kandísa Abraham, noón kúú nà xí'o ña kataki nà ni xi'i, ta ká'an nà sa'á ña vei koo, ta taó nà kuendá ña sa íoan.

¹⁸ Ni kandísa ndaa Abraham ña ni ka'an Ndios xí'ín ná, va'ará koó ka tandeé iní ña kaki iin de'e na. Tído sa'á ña ni kandeé ini nà Ndios, sa'á ñoó ni kasandaá nà kúú ná iin tatá noó kua'á nda'o ñayuu, táto'on ki'o ni kaa mií Ndios xí'ín ná: “Ki'o dión ví kua'a kakuu de'e de'e ñánóon.” ¹⁹ Ta sa'á ña iin ndaa Abraham xí'ín ña kándéé ini nà ña koo de'e na, va'ará sa'á ni kusá'ano na, chi ío nà táto'on iin ciento kuia. Ta daá dókó o koo de'e va kúú dókó Sara. ²⁰ Tído ko ní kútúú ini nà, ta ko ní nákaní kuáchi ini nà sa'á ña ni ka'an Ndios ña koo de'e na. Di'a ni nakuín toon cháa ka nà xí'ín ña kándéé iní nà Ndios. Ta ni nakí'o na ñañó'ó noo ná. ²¹ Dá chi ni kandaá kaxí ini nà ña ío choon noo ndá'a Ndios ña kee na ndidaá kúú ña'a ni kaa nà kee na. ²² Ta sa'á ña ni kandeé iní nà Ndios, sa'á ñoó ni kandoo vii ná noo ná. ²³ Ta o duú sa'a iin tó'ón Abraham ká'an tuti ii Ndios ña ni kandoo vii ná noo Ndios sa'á ña ni kandeé ini ñaá ná, ²⁴ dá chi nda sa'a yóó ta'ani ká'an, chi kandoo vii ta'ani yó noo Ndios sa'á ña kándéé iní yo ná, ta mií ná ni danátaki Jesús, nà kúú sato'o yo. ²⁵ Ta nà yó'o kúú nà ni nakí'o mií ni xi'i nà sa'á kuáchi yó. Dá ni danátaki ñaá Ndios, dá kuu kandoo vii yo noo mií ná sa'a Jesús.

Sa ni kandoo vii vá yó noo Ndios sa'á ña kándéé iní yo Jesús

5 ¹ Ni kandoo vii vá yó noo Ndios sa'á ña kándéé iní yo ná, sa'á ñoó sa ndéi va'a yó xí'ín ná sa'á ña ni kee Jesucristo, nà kúú sato'o yo. ² Ta sa'á ña ni kee Jesús, sa'á ñoó ni ndu'u yó tixi ndá'a ña maní ni kee Ndios sa'á ña kándéé iní yo ná, ta ndíta toon yó xí'an. Sa'á ñoó kadii iní yo sa'á tandeé iní ña kían kandeí chíchí yó noo ndato náye'e noo ío nà. ³ Ta o duú sa'a iin tó'ón ña yó'o ni kadii iní yo, chi kadii ta'ani iní yo tein tandó'ó ndó'o yó, dá chi sa ná'a vá yó ña tandó'ó kedaá, dá katí'a yó kündeé ini yo. ⁴ Ta sa'á ña kündeé ini yo, sa'á ñoó kána va'a yó noo Ndios, ta sa'á ña kána va'a yó noo mií ná, sa'á ñoó ni'i yo cháa ka tandeé iní noo ná. ⁵ Ta tandeé iní yó'o kían ko dátuu ta'an vaan yó, chi ni nakutí nío yo xí'ín ña kú'u nda'o ini Ndios sa'a yo ni kee Espiritu ii mií ná, nà ni xi'o na noo yo.

⁶ Ko kandeé yó dáka'ki yó mií yó, sa'á ñoó ni kii Cristo Jesús tá ni kasandaá tiempo ni kaxi Ndios, ta ni xi'i nà sa'á nà kómí kuáchi. ⁷ Miían

nda*a* iin ñ*a* ku*a*chi nda'o k*í*an ñ*a* naki'o iin ñ*a*yuu mi*í* ná ñ*a* kuu na sa'a iin ñ*a*yuu nda*a*. Tído ndá ndi kuu ió iin ñ*a*yuu xino ini naki'o na mi*í* ná ñ*a* kuu na sa'a iin ñ*a*yuu va'a. ⁸ Tído Ndios kúú na ná'a ñ*a* kú'u nda'o ini na sa'a yo, dá chi xian nani kúú i*i* vá yó ñ*a*yuu kóm*í* ku*a*chi, Cristo Jesús kúú na ni xi'i sa'a yo. ⁹ Ta sa'a ñ*a* ni kandoo vii yo noo Ndios sa'a ñ*a* ni sata Jesús ni*i* ná sa'a yo, sa'a ñoó miian nda*a* kuiti k*a*ki va yó kee mi*í* Jesús noo ñ*a* xido ini Ndios xini na ñ*a*yuu kóm*í* ku*a*chi. ¹⁰ Chi ni sa kuu yó ñ*a*yuu ko ní sá ne'e tá'an va'a xí'in Ndios, tído ni naki'in tá'an va'a Ndios xí'in yó sa'a ñ*a* ni xi'i de'e na sa'a yo. Ta viti sa'a ñ*a* ni naki'in tá'an va'a yó xí'in ná, sa'a ñoó miian nda*a* kuiti k*a*ki yó sa'a ñ*a* ni natak*i* de'e na ió na. ¹¹ Ta o duú ñ*a* yó'o oon ni ni'i yo, chi ió ndeé ini yo xí'in Ndios sa'a Jesucristo, na kúú sato'o yo, chi sa'a mi*í* ná ni kasandaá yo ni naki'in tá'an va'a yó xí'in Ndios.

Sa'a ku*a*chi ni kee Adán kánian kuu yo, ta sa'a ñ*a* va'a ni kee Jesús ni'i yo ñ*a* kataki chíchí yó

¹² Ta sa'a ñ*a* ni ya'a iin t*a*a naní Adán ni kee ra ku*a*chi, sa'a ñoó ni kasá'a ñ*a*yuu nde*i* ñ*a*yuu yó'o k*e*e na ku*a*chi. Ta sa'a ñ*a* ni kee t*a*a ñoó ku*a*chi, sa'a ñoó ni xi'i ra. Dá ni kasá'a ta'ani xí'i ndidaá kúú ñ*a*yuu, chi ndidaá ná ni kasá'a yá'a k*e*e ku*a*chi. ¹³ Tá o ñá'a ki'o Ndios ley na noo Moisés, sa nde*i* va ñ*a*yuu sa kee na ku*a*chi. Tído sa'a ñ*a* ko ní ya'a na noo ni iin ley, sa'a ñoó ko ní taó kuenda Ndios ku*a*chi ni kee na. ¹⁴ Tído nda tiempo Adán, ta nda tiempo Moisés sa xí'i ñ*a*yuu, va'ará ko ní ya'a na noo choon sa'ándá Ndios táto'on ni kee Adán.

Ta Adán ni sa kuu táto'on iin konda'i iin ka t*a*a ni kii sata rá. ¹⁵ Tído diin va kúú ñ*a* va'a ní'i yó noo Ndios o duú ñ*a* ní'i yo sa'a ku*a*chi ni kee Adán. Dá chi sa'a ku*a*chi ni kee ra, ní'i ndidaá kúú ñ*a*yuu ñ*a* xí'i na. Tído kua'a nda'o ñ*a*yuu ní'i kua'a nda'o ñ*a* man*i* xí'in ñ*a* va'a noo Ndios sa'a ñ*a* ni kee iin ka t*a*a, na kúú Jesucristo.

¹⁶ Chi ñ*a* va'a ní'i yó noo Ndios, ko kúú nóo ta'an vaan xí'in ñ*a* ní'i yo sa'a ku*a*chi ni kee Adán. Dá chi sa'a ñ*a* ni ya'a Adán ni kee ra ku*a*chi ñoó, sa'a ñoó ni kasá'a ndó'o nio yo, ta ni kandoo yó kúú yó ñ*a*yuu kóm*í* ku*a*chi noo Ndios. Tído sa'a ñ*a* kóm*í* yó kua'a nda'o ku*a*chi, sa'a ñoó ni kee Ndios ñ*a* man*i* xí'in yó, dá ná kuu kandoo vii yo noo ná. ¹⁷ Ta sa'a ñ*a* ni ya'a iin t*a*a ni kee ra ku*a*chi, sa'a ñoó ní'i ndidaá ñ*a*yuu ñ*a* xí'i na. Tído yóo kúú na ni'í ñ*a* kataki chíchí yó sa'a ñ*a* ni kee iin ka t*a*a, na kúú Jesucristo, chi sa'a mi*í* ná ní'i yó kua'a ñ*a* man*i* noo Ndios, ta ní'i ta'ani yó ñ*a* kándoo vii yo noo ná. ¹⁸ Ta sa'a ku*a*chi ni kee iin tó'on t*a*a, sa'a ñoó ndidaá ñ*a*yuu kándoo kúú ná na kóm*í* ku*a*chi noo Ndios. Ta ki'o dión ta'ani sa'a ñ*a* va'a ni kee iin ka t*a*a, sa'a ñoó ndidaá ñ*a*yuu kuu kandoo vii noo Ndios, ta ni'i ná ñ*a* kataki chíchí ná.

¹⁹ Chi sa'a ñ*a* ko ní seídó'o iin t*a*a choon ni sa'anda Ndios noo rá, sa'a ñoó ndidaá kúú ñ*a*yuu kóm*í* ku*a*chi noo Ndios. Ta sa'a ñ*a* ni seídó'o iin

kā tāa choon ni sa'anda Ndios noo ná, sa'á ñoó kua'á nda'o ñayuu ni'í ñā kandoo vii ná noo Ndios. ²⁰ Ni xi'o Ndios ley na noo yo, dá ná kandā ini yo ñā kua'á nda'o kuachi kómí yó noo ná. Tído sa'á ñā ni ndukua'a kā ví kuachi yo noo ná, sa'á ñoó ni nduká'ano cháá kā ví ñā mani ni kee na xí'ín yó. ²¹ Chi táto'on sā dándáki kuachi ñayuu, dá sā xí'í na, k'i'o dión ta'ani dándáki ñā mani Ndios ndidaá yó, dá kandoo vii yo noo ná, dá ni'í yo ñā kataki chíchí yó sa'a Jesucristo, na kúú sato'o yo.

Sa ni xi'í va yó noó kuachi, ta ni nataki yo kandisa yó Jesús

6 ¹ ¿Ndi ká'an ndó viti? ¿Á va'a va kee ii yó kuachi, dá ná ku'u ká'ano cháá kā ini Ndios sa'a yo? ² Koó, kō ta'ón dión kíán. Dá chi sa ni xi'í va yó noó kuachi, sa'á ñoó, ¿ndi kee yó nandió kuéi yó kee tuku yóan, tá dáá? ³ ¿Á ko ná'á ta'on ndó ñā tá ni sodoo ndúta yo, dá iin ni nduu yó xí'ín Cristo Jesús? Chi tá ni sodoo ndúta yo kíán táto'on ni xi'í nduú yo xí'ín ná. ⁴ Ta sa'á ñā ni xi'í nduú yo xí'ín ná, sa'á ñoó ni nduxi nduú yo xí'ín ná tá ni sodoo ndúta yo. Dá kíán, táto'on k'i'o ndato téi ni danátaki Ndios Cristo Jesús xí'ín ndée ndato na, k'i'o dión ta'ani ni nataki yo kandeí yó kakuu yó ñayuu sa'á ni kee Ndios. ⁵ Táto'on k'i'o iin ni nduu yó xí'ín ná tá ni xi'í nduú yo xí'ín ná, k'i'o dión ta'ani nataki yo táto'on k'i'o ni nataki mií ná.

⁶ Kándāa inio ñā ni sarkaa nduú ñā ni sā kuu yó tá sata xí'ín Jesús ndika cruz, dá kían ná naá ñā kátoó ñíi yo keean kuachi, dá ná dá'a ka ni kee yó choon sa'ándáan. ⁷ Chi ñayuu ni xi'í, sa ni kexoo na tixi ndá'a kuachi. ⁸ Ta sa'á ñā ni xi'í nduú yo xí'ín Cristo Jesús, sa'á ñoó kándée ká'ano iní yo ñā kandeí nduú yo xí'ín ná. ⁹ Chi sa ná'á yó ñā ni nataki Jesús, sa'á ñoó o nándiío koo kā na kuu na, chi koó kā choon noo nda'á ña sa'ání ndii ña ka'ání ñaá.

¹⁰ Chi tá ni xi'í Jesús, ta kúú iin tó'ón dáá vá ni xi'í na sa'a ndidaá kuachi yó. Ta viti takí na ió na kée na ña kóni Ndios. ¹¹ Ta dión ta'ani taó kuendá ndo ña ni xi'í ndo noó kuachi, ta viti takí ndo kée ndó ña kóni Ndios sa'á ña ni kee Cristo Jesús, na kúú sato'o yo.

¹² Sa'á ñoó ná dá'a ni konó kā ndo ña dándáki kuachi ñíi ndíxi tóo ndó. Ta ná dá'a ka ni kueídó'o ndó ña kini kóni ñíi ndo keean. ¹³ Ta ni o sa kí'o ndó ni lú'u ñíi ndo noó kuachi, dá kakian iin ña'a kéchóon noó ña kini. Di'a naki'o ndó míi ndó noo Ndios táto'on iin ñayuu ni nataki tein na ni xi'í. Ta naki'o ta'ani ndó ñíi ndo noo Ndios, dá ná kakian iin ña'a kéchóon noó ña va'a. ¹⁴ Ko dándáki ka kuachi ndo'ó, dá chi ko ñó'o ka ndo tixi ndá'a ley Moisés, ndaá di'a noo ndá'a ña mani Ndios vá ñó'o ndó viti.

Kúú yó na kée ña va'a kóni Ndios

¹⁵ Sa'á ñoó, ¿á kuu va ya'a yó keeá kuachi sa'á ña ko ñó'o ka yo tixi ndá'a ley ñoó, chi ndaá noo ndá'a ña mani Ndios vá ñó'o yó viti? Koó, o

kúu ta'on. ¹⁶ ¿Á kō ná'á ta'on ndó ña tá naki'o ndó mií ndó ña kakuu ndó ña kéchóon noo iin sato'o, dá kían kánian kueídó'o ndó ña, chí ñó'o ndó tixi ndá'a ná? Sa'á ñoó tá ná naki'o ndó mií ndó tixi ndá'a kuachi kakuaan sato'o ndo, dá kían ni'i ndo ña kánian kuu ndo. Tído, tá ná naki'o ndó mií ndó tixi ndá'a ña kóni Ndios, dá kían ni'i ndo ña kandoo vii ndo noo ná.

¹⁷ Tído náki'o yu'u ndiv'e noo Ndios, dá chí va'ará ni sa ño'o ndó tixi ndá'a kuachi, tído ni kandísa ndaa ndo xí'ín ndino'o nío ndo ña kúu to'on va'a ni ñatiin ndó. ¹⁸ Ta sa'á ña ni kankuei xoo ndó tixi ndá'a kuachi, sa'á ñoó ni kasandaá ndo kúu ndó ña kée ña va'a kóni Ndios.

¹⁹ Ióji dáki'in tá'in dao to'on xí'ín ña dána'i noo ndo, dá chí sava'a ñaxintóni ña va kómí ndó. Chí táto'on ki'o ni naki'o ndó ñi ndo kean ña ka'an noo xí'ín ña xíxi ini tá sata, ki'o dión ta'ani naki'o ndó mií ndó viti kee ndó ña va'a kóni Ndios, dá kasandaá ndo koo vii ndo noo ná.

²⁰ Chí tá ni sa ño'o ndó tixi ndá'a kuachi, ni sa ndita xoo ndó noo ña va'a kóni Ndios. ²¹ Tído, ¿ndí kían va'a ni ni'i ndo sa'á ña kini ni sa kee ndó, tá'an ña kedaá xí'ín ndó, dá xíka'an noo ndo viti? Chí sava'a ña ni'i ñayuu kée dión kían kánian kuu ña. ²² Tído viti sa ni kankuei xoo ndó tixi ndá'a kuachi, ta ni nduu ndó ña kéchóon noo Ndios. Ta ña va'a ni'i ndo noo Ndios kían ña koo vii ndo noo míí ná, ndi'i daá, dá ni'i ndo ña kataki chíchí ndó. ²³ Chí ya'i ni'i yo sa'á ña kée yó kuachi kúu ña kánian kuu yo. Tído ña va'a xí'o oon Ndios noo yo kúu ña ni'i yo ña kataki chíchí yó sa'á ña kándéé iní yo Cristo Jesús, ña kúu sato'o yo.

Ko ñó'o ka yo tixi ndá'a ley Moisés

7 ¹ ¿Á kō ná'á ta'on ndó, ñani, ndo'ó ña ná'á ndi ká'an ley, ña dándáki ley ñayuu sava'a nani takí ña ndéi na? ² Chí kían táto'on ki'o ndó'o iin ná'a ni tandá'a, chí ndíko tá'an xí'ín yíian noo ley nani takí ra. Tído, tá ni xi'i ra, dá kían ni ndaxí vá ná'a ñoó xí'ín yíian noo ley. ³ Tído tá ió takí yíian xí'án, ta ni naki'in tá'an xí'ín iin ka ña, dá kían yá'an kéeán kuachi xí'ín ra kō kúu yíian. Tído tá ni xi'i yíian, dá kían ni nono nooan noo ley ñoó. Sa'á ñoó tá ni tandá'an xí'ín iin ka ña, dá kían kō yá'a ta'an vaán kéeán kuachi.

⁴ Ta dión ta'ani ndó'o ndo'ó, ñani mií. Sa ni xi'i va ndó noo ley sa'á ña ni xi'i Cristo Jesús sa'a ndo, dá naki'in tá'an ndó xí'ín mií Jesús, ña ni nataki tein ña ni xi'i, dá kuu kee yó ña va'a noo Ndios. ⁵ Chí tá ni sa ndei yó sa kee yó ña kóni ñi yo, xini ndidaá kuachi kini sa katoó yo sa kee yó, chí ley sa dandóto ña kini ñó'o nío yo, dá sa katoó yo kee yóan, ta ña ni'i yó sa'á ña sa kee yó ña yó'o kían ña kánian kuu yo, ní kúu.

⁶ Tído viti ni kankuei xoo yó tixi ndá'a ley, chí sa ni xi'i yo noo ña sa dándáki yó tá sata. Ta viti ni ndu'u yó tixi ndá'a iin choon saá, ña kúu ña kóni Espíritu i Ndios, ta kō ñó'o ka yo tixi ndá'a ley yatá.

Yó'o ká'an Pablo sa'á kuachi nákaa ini na

⁷ ¿Ndi kaa yo viti? ¿Á ko ta'on ña va'a kúu ley yó'o? Koó, ko ta'on dión kían. Tído ko ní sá na'á ta'on yu'u ndí kían kúu kuachi tá ko ní dána'a ley nooí. Chì ndi koo kandaá ini yu'u ña ko kánian katoói ña'a kómí dao ka ñayuu tá ko ní kaa ley di'a xí'ín: “Ná dá'a ni katoó ndo ña'a kómí dao ka ñayuu.” ⁸ Tído tá nì kandaá ini ña dión sa'ándá ley choon, kuachi nákaa ini nì kedaá xí'ín, dá nì kasá'á katoó cháa kai kakomí ña'a dao ka ñayuu. Chì tá ko ní sá na'í ley, iin ña'a ko sá taki va sa kuu kuachi nooí. ⁹ Tá sa na'á nì ka'ín ña va'a nì sa ioi xí'ín Ndios, chì ko ní sá na'í choon sa'ándá ley na. Tído tá nì kandaá ini choon sa'ándáan, dá nì naní'i ndée cháa ka ví kuachi kéei, ta nì kandaá ini ña kánian kuui. ¹⁰ Nì xì'o Ndios choon yó'o noo yo, dá kandeí va'a yó. Tído ña yó'o di'a nì kedaá xí'ín yu'u, dá nì kandaá ini ña kánian kuui noo Ndios. ¹¹ Chì nì tiin ndaa ña kúu kuachi choon sa'ándá ley, ta nì danda'avían yu'u. Sa'á ñoó kuachi yu'u kían nì kedaá xí'ín, dá nì xii noo Ndios nì kee choon sa'ándá ley. ¹² Tído miían ndaa ña ii kúu ley yó'o, ta choon sa'ándáan kúu ña ii, ta kían ña ndaa xí'ín ña va'a.

¹³ Sa'á ñoó, ¿á ley va'a yó'o kían nì kedaá xí'ín yu'u ña kánian kuui? Koó, chì nì na'a kuachi miían ña kían ña kini, chì miían nì xì'o ña kánian kuui nì kee ley va'a yó'o. Ta sa'á ña kée ña kúu kuachi dión xí'ín ley yó'o, sa'á ñoó ná'an miían ña kini nda'o ña. ¹⁴ Chì ná'á yó ña iin ña ii nì kii noo Ndios kúu ley, tído yu'u kúu iin taa ñayuu yó'o, chì nákaaí tixi ndá'a kuachi. ¹⁵ Ko kandaá ta'on ini yu'u ña kéei. Chì ko kéei ña va'a ká'ín keei. Di'a ña ko náta'an ini keei, dión kéei. ¹⁶ Tá kéei ña ko kónii keei, dá kían nákonii ña iin ña va'a nda'o kúu ley. ¹⁷ Chì o duú mií ka yu'u kée ña kini. Kuachi nákaa ini vei kían kedaá xí'ín, dá kéei ña. ¹⁸ Ta ná'á vá yu'u ña ko ta'on ña va'a nákaa ini, ta ña yó'o ká'ín sa'a ñíí. Chì miían ndaa ká'ín keei ña va'a, tído ko kándeé ta'oin keei ña. ¹⁹ Dá chì ko kée ta'on yu'u ña va'a ká'ín keei. Di'a ña kini, ña ko ká'ín keei, ñoó di'a kée yu'u. ²⁰ Chì tá kée yu'u ña ko ká'ín keei, dá kían o duú ta'on mií yu'u kée ña. Kuachi nákaa ini vei, ñoó vá kían kedaá xí'ín, dá kéei ña.

²¹ Ta ña yó'o kían ndó'i tá ká'ín keei ña va'a, chì ña kini nákaa ini, ñoó kían sadí nooí. ²² Ta ndino'o ini miíí náta'an ini xini choon sa'ándá ley Ndios, ²³ tído ió iin ka ña'a ndó'i, chì ña kóni ñííí naá tá'an xí'ín ña va'a kóni ñaxintóníí. Ta kúu kándeé vá ña kóni ñííí náchi'an yu'u tixi ndá'a kuachi.

²⁴ ¡Nda'í kúu ví yu'u! ¿Ndá yoo ví dákaiki yu'u tixi nda'á kuachi kóni ñííí, ña né'e ña kua'in kuui? ²⁵ Tído náki'o yu'u ndivé'e noo Ndios sa'á ña nì kee Jesucristo, na kúu sato'o yo. Ta di'a ndó'i: xí'ín ñaxintóníí kéei choon sa'ándá ley Ndios, tído ñííí kían nákaa ii vá tixi ndá'a kuachi.

Ña yó'o kúú ña va'a xí'o Espíritu iì Ndios noo yo

8 ¹ Ta viti kían koó ka kuachi yó noo Ndios sa'á ña iin ni nduu yó xí'ín Cristo Jesús, chì ko ndéi ka yo kee yó ña kóni ñíi yo, ndaa ndéi yó kée yó ña kóni Espíritu iì Ndios. ² Chì Espíritu iì Ndios, na xí'o ña kataki chíchí yó sa'a Cristo Jesús, noón kúú na ni taó xóo yu'u tixi nda'á kuachi, xí'ín noó ña kánian kuui. ³ Chì ko ní kándeé ta'on ley taó xóoan yó tixi nda'á kuachi, chì ko ní kándeé yó kee yó choon sa'ándaan. Sa'á ñoó ni tanda'á Ndios de'e maní ná ni kii na ñayuú yó'o, ta ni nduu na iin taa ñayuú yó'o táto'on kúú mií yó, na kómí kuachi. Chì ni kii na nakuido na kuachi yó, dá ni kuu ni taó xóo na yó tixi ndá'an. ⁴ Ta kí'o dión ni kándeé ná ni daxínkoo ndi'i na choon sa'ándá ley Ndios sa'a yóo, na ko ndéi ka kee ña kóni ñíi, ndaa ndéi yó kée yó ña kóni Espíritu iì Ndios.

⁵ Ta ñayuu ñó'o tixi nda'á ña kóni ñíi ná, noón kúú na ndí'i cháá ka ini kee ña kóni mií ná. Tído na ñó'o tixi ndá'a Espíritu iì Ndios, noón kúú na ndí'i cháá ka ini kee ña kóni mií Espíritu. ⁶ Chì ñayuu ndí'i ini kee ña kóni ñíi ná, noón kúú na ni'í ña kuu na. Tído ñayuu ndí'i ini kee ña kóni Espíritu iì Ndios, noón kúú na ni'í ña kataki chíchí ná, xí'ín ña koo va'a ini na. ⁷ Chì ña kini kóni ñíi yo, ñoó kían naá tá'an xí'ín ña kóni Ndios, dá chì ko kónian kueídó'an choon sa'ándá na, ta ko kátí'aan keean ña. ⁸ Sa'á ñoó na ndéi kée ña kóni ñíi ná, noón kúú na o kándeé ña nata'an ini Ndios koni ñaá ná.

⁹ Tído ndo'ó, ko ndéi ka ndo kee ndó ña kóni ñíi ndo, ndaa ndéi ndó kée ndó ña kóni Espíritu iì Ndios, tá miían ndaa ió na ini ndo. Tído tá ió iin káa ndó ko ñá'a kakomí Espíritu Cristo ini nío ndo, dá kían ko kúú ta'on ndó kuendá na. ¹⁰ Tído tá ió Cristo ini ndo, dá kían sa ni xi'i va ñíi ndo noó kuachi, tído takí va espíritu ndo, chì sa ni kandoo vii ndó noo Ndios. ¹¹ Tá miían ndaa ió Espíritu na ni danátaki Jesús ini ndo, dá kían na ni danátaki Cristo Jesús tein na ni xi'i, noón ta'ani kúú na dánátaki yikí koño ndo kée Espíritu iì ná, na ió ini ndo. ¹² Sa'á ñoó, ñani miíi, kánian kee yó ña kóni Espíritu iì Ndios, ta ko káni kaan kee yó ña kóni ñíi yo. ¹³ Chì tá ndéi ndó kée ndó ña kóni ñíi ndo, dá kían kánian kuu va ndó. Tído tá dándí'i ndó ña kini kóni ñíi ndo xí'ín ndée Espíritu iì Ndios, dá kían kataki chíchí ndó.

¹⁴ Chì ndidaá na xí'o mií ña kandaka ñaá Espíritu iì Ndios, noón ndisa kúú de'e Ndios. ¹⁵ Dá chì ko ní nátiin ndó iin espíritu, tá'an ña kedaá xí'ín ndó, dá kaño'o tuku ndó tixi ndá'a ña yu'ú ndo. Di'a ni natiin ndó Espíritu iì. Ta mií ná ni ndee ndó de'e Ndios. Ta mií ná kedaá xí'á, dá káyu'ú yó na di'a: “Tatá ló'o miíi.” ¹⁶ Ta Espíritu iì Ndios kúú na xí'o kuendá noo espíritu míi yó ña miían ndaa kuiti kúú yó de'e Ndios. ¹⁷ Ta sa'á ña kúú yó de'e Ndios, sa'á ñoó ni'i ta'ani yó ña ni kaa Ndios kí'o na noo yo, ta natiin nduú yoán xí'ín Cristo. Tá ná ndo'o naní nío yo sa'a ná,

táto'on ni ndo'o mií ná, dá kían natiin nduú yo ñañó'ó xí'ín ná noo ndato káa induú.

¹⁸ Tído yu'u kúú ra kándaá ini ña o náki'in tá'an ta'an vaan ña ndó'o nío yo tiempo viti xí'ín ña ndato téi koni yo na'a Ndios noo yo chí noo.

¹⁹ Chì ndáti kí ndidaá ña'a ni kava'a Ndios ña kasandaá kuu na'a Ndios ndá yoo kúú de'e na. ²⁰ Ta ndidaá ña'a ni kava'a Ndios ni ni'i tá'i ña tuúán. Tído o duú sa'á ña kóni miían ndó'an dión, dá chí kí'o dión ni koni mií Ndios kee na xí'án. Tído ni xi'o na tandéé iní ña kasandaá iin kuu, ²¹ dá taó xóo naan tixi ndá'a ña kua'an tuúán, dá natiian ña ndato kooan táto'on kí'o ndato téi kandeí na kúú de'e Ndios.

²² Chì sa ná'á yó ña sa ndidaá kúú vá ña'a ni kava'a Ndios nda'í tána viti, ta ndó'o naní nío ña táto'on kí'o ndó'o iin ná'a tá kua'an kaki de'án. ²³ Ta o duú sava'a iin tó'ón ña yó'o ndó'o dión. Chì dión ta'ani ndó'o yóó, na ni natiin Espíritu i Ndios, ta na yó'o kúú ña va'a mií noó ni xi'o Ndios noo yo. Ta nda'í ta'ani tána ini yo, chí ndáti kí yo ña na'a Ndios ña kúú yó de'e na, dá ndesaá na yikí koño yo. ²⁴ Chì ni natiin yó tandéé iní yó'o tá ni kaki yó noó kuachi yo. Tído tá ió tandéé iní yo xí'ín ña'a ió noo yo, dá kían ko ta'ón tandéé iní kían. Chì tá ió ña'a noo yo, ¿ndá choon kandati yóan? ²⁵ Tído tá ndáti yó iin ña'a ko ndé'á, dá kían kánian kandati kueé yoán.

²⁶ Ta di'a ta'ani kée Espíritu i Ndios chíndeé ná yó, chí ko káti'a yó ka'an yo xí'ín Ndios táto'on kí'o kánian kee yó. Sa'á ñoó nda'í tána mií Espíritu i Ndios seí nda'í na sa'a yo noo Ndios. Ta ko ní'i yó to'on nakanió sa'á ña ká'an na xí'ín Ndios. ²⁷ Ta ná'á vá Ndios ndi káa nío ñayuu. Sa'á ñoó kándaá va'a ini na ndí kían kóni Espíritu i ná, dá chí mií Espíritu kúú na seí nda'í sa'á ñayuu mií ná táto'on kí'o náta'an ini mií Ndios.

Kándéé yó xí'ín ndidaá ña ndó'o yó kée Ndios

²⁸ Ta sa ná'á vá yó ña sa'á ña kóni yo Ndios, sa'á ñoó ndidaá kúú vá ña'a ndó'o yó ndúuan ña va'a kée mií Ndios, chí ni kaxi ñaá mií ná táto'on kí'o ni chikaa ini mií ná koo. ²⁹ Chì nda rá mí sa'a vá ná'á Ndios ndá yoo kakuu ñayuu na, ta nda daá vá ni saki na noón kakuu na táto'on kí'o kúú de'e mií ná, dá kían de'e mií ná ná kakuu de'e kúú noó noo ndidaá kúú ñayuu ni nduu ñani na. ³⁰ Chì ñayuu ni saki mií Ndios nda rá mí sa'a, na yó'o ta'ani kúú na ni nakana mií ná. Ta na ni nakana na ñoó, noón kúú na ni nduvii ná. Ta na ni nduvii ná ñoó, noón kúú na ni'í ñañó'ó noo mií ná noo ndato káa chí induú.

³¹ ¿Ndi kaa yo sa'a ña yó'o, viti? Tá ió Ndios xí'ín yó, ¿ndá yoo kandeé xí'ín yó, tá dáá? ³² Ta ko ní kádí'inda ta'on Ndios de'e na, di'a ni nakí'o ñaá ná ni xi'i na sa'a yo. Sa'á ñoó miían ndaa ni'i nduú yo ndidaá kúú ña va'a xí'ín de'e na. ³³ ¿Ndá yoo kandeé chinóo kuachi yóó, na ni kaxi mií Ndios? Chì mií vá Ndios kúú na ni dankoo vii yó noo mí ná. ³⁴ Ta,

¿ndá yoo ví kandeé ka'an ña kánian kuu yo sa'á kuachi yo? Chi Cristo kúu na ni xi'i sa'a yó, ta kúu ni nataki na, ta ió na xoo kuá'a tatá Ndios seí nda'í na sa'a yo. ³⁵ ¿Ndí kián kandeé ña dánkoo Cristo ña kú'u ini na sa'a yo? ¿Á kandeé tandó'ó, o ña kúnda'í ini yo, o ña kéndava'a ñayuu xí'ín yó, o ña ko ní'i yo ña'a kasá'an yó, o ña koó dá'on kandixi yó, o ña io ña kuu yo, o ña ka'ání ñayuu yó xí'ín espada? ³⁶ Koó, dá chi di'a ká'an tuti ii Ndios:

Sa'á ña kándísa ndu'u mií ní, sa'á ñoó ndidaá kuu ndúkú ñayuu ndu'u ka'ání ná.

Táto'on ki'o káxi na léko ka'ání ná, ki'o dión kée na xí'ín ndu'u.

³⁷ Tído noo ndidaá kúu tandó'ó yó'o, di'a ni kandeé vá yó ni kee Cristo, na kú'u ini sa'a yo. ³⁸ Sa'á ñoó kándéé ká'ano ini ña ni iin tó'on ta'on ña'a o kándeé ña dánkoo Ndios ña kú'u ini na sa'a yo. Ni ña kuu yo, ni ña kataki yo, ni ángel ndéi noo Ndios, ni ña né'e choon, ni ña kómí ndée chí induú, ta ni ña'a ndó'o yó viti, ta ni ña'a vei ndo'o yó chí noo, ³⁹ ta ni ña ió noo díkó, ni ña ió nda maá tii ñó'o, ta ni iin tó'on ka ña'a ni kava'a Ndios o kándeé ña dánkoo na ña kú'u ini na sa'a yo, chi ná'a na ña kú'u ini na sa'a yo sa'á ña ni kee Cristo Jesús, na kúu sato'o yo.

Ká'an Pablo ña ni kaxi Ndios na Israel kakuu na ñoo na

9 ¹ Ña ndaa ndisa kúu ña ko'in ka'in xí'ín ndó sa'á ña kúu kuendá Cristo. Ta ko ká'an ta'on yu'u ña to'on, chi Espíritu ii Ndios kúu na ndáka ña nákaní ini, ta xí'o na kuendá ña dión kián. ² Chi miían ndaa kúnda'í nda'o ini, ta daá kuití vá u'u nímaí sa'á na ñooi. ³ Ta ió yu'u ña tai chi'ain noo Ndios, ta nataó xoo na yu'u noo Cristo tá dión chindeéan na Israel, na kúu na ve'e mií. ⁴ Chi kúu ná na ve'e ta Israel, ta ni ndee ñaá Ndios na ñoo mií ná, ta ni xini xí'ín noo ná táto'on ki'o náye'e ndaa Ndios, ta ni kandoo Ndios xí'ín ná ña kemáni ñaá ná, ta ni xi'o na ley na noo ná, ta ni daná'a ta'ani na noo ná ndi kee na kandaño'o ndisa ñaá ná, ta ni xi'o na to'on na ña kee na ña va'a xí'ín ná. ⁵ Ta ñayuu yó'o ta'ani kúu na ve'e na sá'ano ni sa ndei sa na'á, ta tein na ve'e yó'o ni kana Cristo, na kúu Ndios dándáki ndidaá tá'an ña'a. Ta daá kuití kánian natiin na ñaño'ó. Dión ná koo.

⁶ Ná dá'a ni ka'án ndó ña ko ní dákinkoo Ndios to'on ni xi'o na noo ná, dá chi o duú ndidaá na Israel kúu ñayuu ni kaxi Ndios. ⁷ Dá chi o duú ndidaá na ve'e Abraham kúu ñayuu Ndios, dá chi di'a ni kaa Ndios xí'ín Abraham: “Xí'ín sava'a de'e Isaac kakuu na ve'ón.” ⁸ Sa'á ñoó o duú ndidaá na ve'e Abraham kúu de'e Ndios. Di'a kúu ná de'e Ndios sa'á ña ni xi'o Ndios to'on na noo Abraham, ta noón ndisa kúu na ve'e Abraham. ⁹ Dá chi di'a va ni kaa Ndios tá ni xi'o na to'on na noo Abraham: “Nata'an noo kuá, dá nandió kooi kasaai, kúu sa ni kaki va de'e Sara.”

¹⁰ Ta o duú ña yó'o oon ni xí'o ña kándaá ini yo ña dión kíán. Dá chī nī tūu ta'ani Rebeca, na nī sa kuu ñadi'í tatá sá'ano yo Isaac, ñó'o de'e na, ta kuátí nī sa kuu xi. ¹¹ Ta nda rá ko ñá'a kaki de'e Rebeca, ta nda rá ko ñá'a kee xi ña va'a, o kee xi ña kini, nda daá vá nī saki ini Ndios kaxi na iin xi. Chī ko kémáni ná yó sa'á ña va'a kée yó, di'a kée na ña nī chīkaa ini mií ná. ¹² Dá chī tá ko ñá'a kaki xi, dá nī kaa na xí'ín Rebeca: “Ta de'ón mií noó, di'a koni kuáchí xí noó de'ón ta ló'o.” ¹³ Chī di'a kaá ta'ani tuti iī Ndios: “Nī ku'u inī sa'a Jacob, ta nī kañó'í Esaú.”

¹⁴ Sa'á ñoó, ¿ndi kaa yo viti? ¿Á ko kényíko ndaa ta'on Ndios choon, ndani? Koó, ko ta'ón dión kíán. ¹⁵ Chī di'a nī kaa Ndios xí'ín Moisés: “Ko'in ku'u inī sa'á na nī chīkaa ini mií ku'u ini sa'a, ta ko'in kī'o ndeé inī sa'á na nī chīkaa ini mií kī'o ndeé ini sa'a.” ¹⁶ Sa'á ñoó ko kú'u ini Ndios sa'á ñayuu sa'á ña kóni ñayuu ñoó ña kee Ndios dión, o sa'á ña va'a kée na. Di'a kú'u ini Ndios sa'á ñayuu nī chīkaa ini mií ná ku'u ini na sa'a. ¹⁷ Dá chī di'a ká'an tuti iī Ndios sa'á ña nī ka'an na xí'ín rey Faraón: “Nī xí'oi ña kakuu yo'ó rey, dá na'í choon ió noó ndá'í xí'ín miíón, dión, dá ná kandaá ini ndidaá tá'an ñayuu ndéi ñayuu yó'o ña yu'u kúu Ndios”, kaá na. ¹⁸ Sa'á ñoó kú'u ini Ndios sa'á ñayuu nī ka'an mií ná, ta kékaxí ná nío ñayuu, na nī chīkaa ini mií ná kekaxí ná.

¹⁹ Sa'á ñoó, ndá ndi kuu kaa dao ndo'ó xí'ín yu'u: “¿Ndiva'a ká'an Ndios ña kómí yó kuachi tá kī'o dión kée na, tá dáá? ¿Ndá yoo kandeé chituu ña nī chīkaa ini mií Ndios kee na xí'á?” ²⁰ Tído di'a kaá yu'u xí'ín ndó: ¿Ndí kían kúu ndo'ó, xiní ndo? ¿Ndiva'a kañó'ó ndó ña kée Ndios? ¿Á kuu ka'an iin kidi ñó'o xí'ín taa nī kava'an: “¿Ndiva'a nī kava'a ní yu'u dión?” ²¹ ¿Á ko ná'a ta'on ndo'ó ña ió choon noó ndá'a taa kava'a kidi ña kava'a raan tát'o'on kī'o ká'an mií rá kooan? Dá chī iin tó'ón dini noó ndei'í kuu va kava'a ra iin kidi luu káa, ta kuu kava'a ta'ani ra iin ka kidi oon.

²² Ta dión ta'ani kée Ndios, dá chī kóni na na'a na tát'o'on kée na tá xído ini na kée kuachi, ta kóni ta'ani na na'a na choon ká'ano né'e na, sa'á ñoó nī sa ndati na ñayuu xí'ín ña kueé ió ini na, tá'an ñayuu kedaá xí'ín ná, dá xído ini na, tá'an ñayuu kánian nī'í ña naá ná. ²³ Dá chī sa'á ña kóni na dána'a na tát'o'on kī'o ká'ano kúu choon kómí ná, sa'á ñoó nī kemáni ná ñayuu, na nī chīkaa ini mií ná ku'u ini na sa'a, ta nī kenduu na ñayuu ñoó nda rá mí sa'a ña kían kandeí na nda noó náye'e ndaa.

²⁴ Ta nī kana Ndios ñayuu ñoó, ta ñayuu ñoó kúu yó, chī ko ní kána na sava'a na Israel, di'a nī kana ta'ani na na ko kúu na Israel. ²⁵ Dá chī di'a ká'an tuti nī taa profeta Oseas sa'á ña nī ka'an Ndios:

Ko'in ndeei ñayuu mií, na ko ní sá kuu ñayuu,
ta kandoo manī ñayuu ko ní sá io manī nooí.

²⁶ Mií mií xían noo nī ka'an Ndios xí'ín ná:

“O duú ta'ón ñayuu yu'u kúu ndo'ó”,

mií ñoó kasandaá ña kananí ná kakuu na de'e Ndios takí.

²⁷ Ta di'a kua'an ña ni taa profeta Isaías sa'á na Israel: "Va'ará táto'on kị'o kua'a kúú ñotí ndéi yu'ú taño'o ná kakuu de'e na ñoo Israel, tído iin tu'u ló'o va na kaki." ²⁸ Dá chi sato'o yo Ndios kúú na ndaka kuendá noo iin rá iin ñayuu, ta keyíko ndaa na sa'a ná, ta yachi nda'o kee na dión."

²⁹ Ta ni kaa ta'ani Isaías di'a:

Tá ko ní ku'u ká'ano ini Ndios, na kómí choon noo ndidaá ángel, sa'á ndu'u,

dá kían naá ndí'i va na sá'ano ve'e yó táto'on kị'o ni ndo'o na ñoo Sodoma xí'ín na ñoo Gomorra, ní kúu.

Kándoo vii yo noo Ndios sa'á ña kándéé iní yo ná

³⁰ ¿Ndi kaa yo sa'á ña yó'o, viti? Kándaá ini yo ña ko ní nándukú na ko kúú na Israel ña kakuu na ñayuu ndaa noo Ndios, tído ni dānkoo vii ñaá Ndios noo míí ná, ta ni kándoo vii ná noo ná sa'á ña ni kándéé ini ñaá ná. ³¹ Tído na Israel ni ndukú ña kendaá na choon sa'ándá ley, dá kándoo vii ná noo Ndios. Tído ko ní kándéé ta'on na. ³² Ta, ¿ndiva'a ni ndo'o na dión, ká'án ndó viti? Dión ni ndo'o na, dá chi ko ní nándukú ná ña kándoo vii ná noo Ndios sa'á ña kándéé iní ñaá ná. Di'a ni ndukú ná kándoo vii ná noo Ndios sa'á ña kée na choon sa'ándá ley. Sa'á ñoo ni kachi'i sá'á ná ni kee yuu ni chindú'u Ndios. ³³ Dá chi di'a kaá tuti i Ndios:

Ko'in chindu'í iin yuu chí ñoo Sion di'a,
dá ná kachi'i sá'á ñayuu ko xín kandísa ñaá,
dá ná kuei na noó ña koon na míí ná.

Tído na kándísa yuu yó'o, ni iin kuu ta'ón o káka'an noo ná keean.

10 ¹ Nani míí, miían ndaa kuiti kóni nda'o yu'u xí'ín ndino'o ini ña ná kasandaá na Israel kaki na, ta kị'o dión xíkai noo Ndios sa'a ná. ² Chi xí'o ndaai kuendá ña ndí'i nda'o ini na kee na ña kóni Ndios, tído ko ná'á ta'on na ndi kee na, dá nata'an ini Ndios, ³ chi ko nákoní na ña ni kee Ndios, dá dānkoo vii ná ñayuu noo míí ná. Di'a ndí'i nda'o ini na Israel kándoo vii ná noo Ndios xí'ín ndéé míí ná. Ta sa'á ña kée na dión, sa'á ñoo ko xí'o na míí ná ña dānkoo vii ñaá Ndios. ⁴ Dá chi míí Cristo kúú na ni daxínkoo choon sa'ándá ley, dá kían kándoo vii ndidaá ñayuu kándísa Cristo noo Ndios.

⁵ Dá chi di'a ni taa Moisés sa'á ñayuu ndúkú kándoo vii noo Ndios sa'a ley: "Na kándéé kée ndi ndi'i kui choon sa'ándá ley, noón kúú na ni'í ña kataki na keean." ⁶ Tído ká'an tuti i Ndios ña kándoo vii yo noo Ndios sa'á ña kándéé iní yo ná, chi di'a ka'an: "Ná dá'a ni ka'án ndó ini ní ndo: ¿Ndá yoo ví kaa induú ki'in ña? (Tá kaá ndo dión, dá kían kénoo ndó Cristo, na ni kii induú.)" ⁷ Ta ná dá'a ni ka'án ndó ini ní ndo: ¿Ndá yoo ví noo nda maá tixi ñó'o ki'in ña?" (Tá kaá ndo dión, dá kían ko nákoní ndo ña ni nataki Cristo.) ⁸ Dá chi di'a va kaá tuti i Ndios sa'á ña yó'o: "Tein míí ndó xa'an va ió to'on va'a, chi ini yu'u vá ndó, ta ini

nío vá ndó nákaa to'on va'a yó'o." Ta dána'a ndu to'on va'a yó'o noo ndo, dá kandeé ini ndo Jesús. ⁹ Chì tá nákonì ndo xí'ín yú'u ndo ña Jesús kúu sato'o noo ndidaá tá'an ña'a, ta kándísa ndó xí'ín ndino'o ini ndo ña nì danátaki ñaá Ndios, dá kían ni'i ndo ña kàki ndó. ¹⁰ Dá chì sa'á ña ndino'o ini ndo kándísa ndó Jesús, sa'á ñoó kándoo vii ndo noo Ndios. Ta sa'á ña nákonì ndo ná xí'ín yú'u ndo, sa'á ñoó konì ndo kàki ndó. ¹¹ Ta di'a ká'an ta'ani tuti iì Ndios: "Ndi ndáa mií nà kándísa ñaá, ni iin kuu ta'ón o káka'an noo ná", kaáan. ¹² Chì iin nóó kúu ndidaá ñayuu noo Ndios, á mií ná kúu ná nà Israel, o koó, chì iin tó'ón míí vá Ndios kúu sato'o noo ndidaá yó. Ta va'a nda'o ini nà xí'ín nà nákonì ñaá. ¹³ Dá chì di'a kaá tuti iì Ndios: "Ta ndi ndáa miíó ñayuu nákonì ña Ndios kúu sato'o nà, noón kúu nà ni'í ña kàki na."

¹⁴ Ta, ¿ndi kee na nakoni nà sato'o yo tá ko ñá'a kandísa ñaá ná? Ta, ¿ndi koo kandísa ñaá ná tá ko ñá'a kueídó'o na sa'a ná? Ta, ¿ndi koo kueídó'o na sa'a ná tá ko iin nà dána'a noo ná? ¹⁵ Ta, ¿ndi koo ko'on nà dána'a nà tá ko iin nà tanda'á ñaá ko'on nà? Chì di'a kaá tuti iì Ndios: "Ndiká'an ví sa'á nà xionoo kásto'on sa'a ndi kee ñayuu koo va'a na xí'ín Ndios, chì xionoo na dána'a nà to'on va'a."

¹⁶ Tído o duú ndidaá nà Israel nì kandísa to'on va'a yó'o, dá chì di'a kaá Isaías: "Sato'o ndu, Ndios, ¿ndá yoo ví nì kandísa to'on nì daná'a ndu'u?" ¹⁷ Miían xínñó'ó ñayuu kueídó'o na to'on va'a, dá kuu kandeé iní nà Jesús, ta to'on va'a yó'o kían ká'an sa'a Jesús. ¹⁸ Tído ndátó'ón yu'u ndo'ó: ¿Á ko ñá'a ta'on kueídó'o nà Israel to'on va'a yó'o, ká'an ndo'ó? Koó, dá chì di'a kaá tuti iì Ndios:

Yó'o yó'o va nì kankuei na xionoo na dána'a nà to'on va'a yó'o iin ní kúu ñayuú,

nda noo xíká cháá ka ñayuú yó'o nì kasandaáan.

¹⁹ Ta ndátó'ón ta'anii ndo'ó: ¿Á ká'an ndó ña ko ní kándaá ta'on ini nà Israel ndi dándáki to'on va'a yó'o? Ka'i ndó ña nì taa Moisés sa'a ná:

Ko'on yu'u ki'oi ña koo kuión ini ndo sa'í xí'ín dao ka ñayuu, dá chì ndee yu'u nà ñayuu mií,

ta ko'in dákuido ini ndo'ó xí'ín ñayuu koó ñaxintóni.

²⁰ Ta nì xi'o ndeé iní Isaías nì ka'an nà di'a xí'ín nà ñoo Israel:

Di'a kaá Ndios:

Nì sonó vá yu'u ña kían nì naní'i ñaá dao ka ñayuu,

va'ará ko nándukú ná yu'u,

ta nì na'a yu'u mií noó nà ko ndátó'ón sa'í.

²¹ Tído di'a nì kaa Ndios ká'an nà sa'á nà Israel: "Iin ní ndii yaká nì chineei ndá'í, dá chindeéi iin ñoo ko seídó'o noo ká'in, iin ñoo káñó'ó noo ká'in."

Ni taó xóo Ndios iin tu'u na Israel, ta noón kúú na kándisa ñaa

11 ¹ Sa'á ñoó ndátó'ón ta'anii ndo'ó: ¿Á ká'án ndó ña ni dankoo ndá'a vá Ndios na ñoo na, tá dáá? Koó, ko ta'ón dión kíán. Dá chi iin ta ñoo Israel ta'ani kúú yu'u, dá chi na ve'e Abraham ta'ani kúú, ta nákaa ta'anii tein na ve'e Benjamín. ² Ta ko ní dankoo ndá'a ta'on Ndios na ñoo na, tá'an na ni kaxi na nda mií sa'a. ¿Á ko ndúsaa ta'on ini ndo ña ká'an tuti i Ndios sa'a profeta Elías tá ni ka'an kuachi na sa'a na Israel noo Ndios? Chi di'a ni kaa na: ³ “Sato'i, ni sa'ání ndí'i ra profeta ní, ta ni dakoon ra noo náa ní, ta ndadá iin tó'ón vá yu'u ni kandoo xoo mií ní. Ta viti ndí'i ini ra ña kíán ka'ání ta'ani ra yu'u.” ⁴ Ta, ¿á ndúsaa ini ndo ña ni kaa Ndios xí'ín Elías? Chi di'a ni kaa na: “O sa nákani inon, dá chi sa ni kaxi xoo va yu'u usa mil ta Israel, tá'an ra ni iin kuu ko ní nákuíta xití noo yoko Baal”, kaáan. ⁵ Ta dión ta'ani kíán tiempo viti, dá chi ni taó xóo ta'ani Ndios iin tu'u na Israel, chi ni kaxi ñaa ná, ta iin ña mani kíán ña ni kee na dión. ⁶ Sa'á ñoó, tá kíán sa'a ña mani ni kee Ndios, dá kíán ko kíán sa'a ña ni kee ñayuu ñoó ña va'a. Dá chi tá ní kaxi ñaa ná sa'a ña ni kee na ña va'a, dá kíán ko kúú kaan iin ña mani.

⁷ Sa'á ñoó, ¿ndi kaa yo sa'a ña yó'o viti? Miían ndaa sa nandukú na Israel ña nata'an ini Ndios koni ñaa ná, tído ko ní kándeé ta'on na. Sava'a na ni taó xóo mií Ndios, noón kúú na ni ni'án. Tído dao ka noón kúú na ni ndukaxí nío. ⁸ Dá chi di'a kaá tuti i Ndios: “Ni xí'o Ndios iin ñaxintóni xixi noo ná, ta ni xí'o na nduchí nóo ko túu noo ná, ta ni xí'o na do'o ko tái noo ná. Ta kí'o dión kíán nda tiempo viti.” ⁹ Ta di'a ta'ani ni kaa David:

Ta víko ná'ano kée na ná nduuan iin dei xí'ín iin ñóno noo ná, dá kachi'i sá'a ná, ta kuei na noán, dá ná ndo'o cháá ka nío ná.

¹⁰ Ta ná kukuaá noo ná, dá o koni ka na, ta ná kutódo sata ná kee ndidaá kuachi ndído na. Ta dión ná kandoo na iin íchi, kaáan.

Ko'on Ndios dákaaki na ñayuu ko kúú na Israel

¹¹ Ta ndátó'ón ta'anii ndo'ó: ¿Á ká'án ndó ña sa'a ña ni kachi'i sá'a na Israel, sa'a ñoó ni kuei chíchi ná? Koó, ko ta'ón dión kíán. Dá chi sa'a ña ni kee na kuachi ñoó, sa'a ñoó ni sonó Ndios noo na ko kúú na Israel ña káki na, dá ná kekuión ini na Israel sa'a ná. ¹² Ta sa'a ña ni kee na Israel ñoó kuachi, sa'a ñoó ni kee Ndios iin ña mani ká'ano xí'ín na ko kúú na Israel. Ta sa'a ña ni tuú na Israel noo Ndios, sa'a ñoó ni keva'a cháá ka na ko kúú na Israel. Ta kúú ndato ka ví ko'on Ndios kee na xí'á tá ná kasandaá kuu ndu'u na Israel tixi ndá'a Ndios.

¹³ Ta viti kónij ka'in xí'ín ndo'ó, na ko kúú na Israel. Yu'u kúú iin apóstol, na ni tanda'a Ndios né'e to'on va'a sa'a Jesús noo ndo, ta ndí'i

nda'o ini dákinkoo va'i choon yó'o, ¹⁴ dá chí kónii ña ná kukuión ini na ñooi sa'á ña maní nī kee Ndios xí'ín ndó, dá ná koni dao na káki na.

¹⁵ Dá chí sa'á ña nī dānkoo xoo Ndios na Israel, sa'á ñoo nī ni'i dao ka ñayuu ndéi ñayuu yó'o ña kandeí va'a na xí'ín ná. Tído, ¿ndi koo tá ná nandió koo Ndios naki'in tá'an va'a na xí'ín na ñoo Israel? Kakian táto'on kī'o nī nataki na tein na nī xi'i.

¹⁶ Tá ña ii kúú tá'í yúsa nī taó ná mií noó dokó ná noo Ndios, dá kían ña ii ta'ani kúú cháá ka yúsa nī kandoo ñoo. Chí tá ii yo'o iin yíto, dá kían nda ndá'a ra ii. ¹⁷ Chí kían táto'on nī sa'anda Ndios dao ndá'a yíto, ta ndo'ó, va'ará kúú ndó táto'on nda'á yíto olivo yukú, tído nī chirndaa Ndios ndo'ó yika iin yíto olivo va'a noó nī ta'anda ñoo. Ta yo'o mií rá xíto ndo'ó, ta ndato takí ndo kéean. ¹⁸ Ta ná dá'a ni ka'an táyíí ndó noo ndá'a yíto, ña nī sa'anda Ndios ñoo. Kaño'o ini ndo ña kó xíto ta'on ndó yo'o yíto ñoo. Di'a yo'o yíto ñoo vá xíto ndo'ó. ¹⁹ Ndá ndi kuu kaa ndo ña nī sa'anda na ndá'a yíto ñoo, dá ná chirndaa na mií ndó. ²⁰ Ndaa va nī sa'anda ñaa Ndios, chí kó ní kándisa ta'on na Jesús. Ta ndo'ó, sa'á ña kándéé iní ndo Jesús, sa'á ñoo tándaa ndo ndika yíto ñoo viti. Tído ná dá'a ni kuryíí ndó. Va'a cháá ka kua'an ndo yu'ú ndo Ndios. ²¹ Dá chí tá kó ní xi'o ká'ano ini Ndios sa'a mií mií ndá'a yíto ñoo, dá kían ni ndo'ó o kí'o ká'ano ini na sa'a. ²² Kana'á ndó ña va'a nda'o ini Ndios, tído ka'í nda'o dándó'o na nío na saá ini. Sa'á ñoo nī dándó'o na nío na Israel, na kó ní xiin kándisa, ta nī keva'a na xí'ín ndó sa'á ña kándisa ndó Jesús. Tído tá ná dānkoo ndó ña kándisa ndó na, dá kían ko'on na ka'anda na ndo'ó táto'on nī kee na xí'ín mií mií nda'á yíto ñoo. ²³ Tído tá ná dānkoo na Israel ña saá ini na, ta ná kándisa ndaa na Jesús, dá kían ko'on Ndios nachirndaa tuku ñaa ná noó nī sarndaa na, dá chí ió choon noo ndá'a ná ña kee na dión. ²⁴ Dá chí nī sa'anda Ndios ndo'ó noo ndá'a yíto olivo yukú, ta nī chindaa na ndo'ó ndika yíto olivo ndáka na, va'ará iin ña kuáchí nda'o kían. Sa'á ñoo, ¿a kó ná'á ta'on ndó ña vaá óon va ko'on tuku na nachindaa na mií mií ndá'a yíto ñoo noó nī sarndaaan?

Kóni Ndios ña nandió kuéi na Israel noo mií ná

²⁵ Ta viti kóni yu'u ña kana'á ndo'ó, ñani, sa'á iin ña'a ná'á iin tó'ón diní Ndios, dá kían ná dá'a ni kuryíí ndó. Nī sonó Ndios ña kían nī kusaá ini kuá'á nda'o na Israel nda ná kasandaá ndu'u ndi'i na kó kúú na Israel, na nī chikaa ini mií Ndios káki. ²⁶ Nda daá ví, dá ko'on na dákaki ndi'i na na Israel. Dá chí kī'o di'a kaá tuti ii Ndios:

Nda yúku Sion kii na dákaki ñaa, ta taó xóo na na ve'e Jacob noo ndidaá ña kini kée na.

²⁷ Chí dión ko'in kandooi kee xí'ín ná tá ná dándóoi kuachi na.

²⁸ Xiní u'u na Israel to'on va'a sa'a Jesús, ta sa'á ña kée na dión, sa'á ñoo nī keva'a mií ndó. Tído sa'á ña nī kaxi ñaa mií Ndios nda mií sa'a, sa'á ñoo kú'u ió ini na sa'a ná, dá chí kī'o dión nī kandoo na xí'ín na

sá'ano ñoo ndu. ²⁹ Chi ni kaxi Ndios na Israel, ta ni kemáni ñaá ná, ta ni iin kuu ta'ón o nándikó iní na. ³⁰ Tído ndo'ó, na ko kúu na Israel, ni sa kuu ndó na koó do'o tá sata. Tído viti ni ni'i ndo ña kú'u ini Ndios sa'a ndo sa'á ña ni kusaá ini na Israel. ³¹ Ta dión ta'ani ndó'o na Israel viti. Chi viti kúu ná na kusaá ini, ta ndo'ó kúu na ni ni'í ña kú'u ini Ndios sa'a ndo. Tído iin kuu ko'on ta'ani Ndios ku'u ini na sa'á na Israel. ³² Ni sonó Ndios ña kían ni kusaá ini ndidaá ñayuu, dá kuu ku'u ini na sa'a ná.

³³ iNandeé ka vían ndichí Ndios! iTa ñaxintóni ná, ko ta'ón noo kásá'an, ta ni noo ndí'an! Ko iin ta'on kándéé kana'á ña ni chikaa ini na kee na, ta o kúu ta'on kandaá ini yo táto'on k'i'o kée na. ³⁴ Chi, ¿ndá yoo kandeé kana'á ndí kían nákani ini sato'o yo Ndios? Ta, ¿ndá yoo katí'a ka'an ni'ini noo ná? ³⁵ Ta, ¿ndá yoo ni kee ña maní xí'ín Ndios, dá ná ndí'i ini na nandió né'e na ña maní yó'o? Ko iin ta'on. ³⁶ Dá chi ndidaá tá'an va ña'a vei noo mií Ndios, ta takían kée mií ná, ta mií ná kómí choon sa'a ndidaá ña'a. Sa'á ñoo ná natiin mií ná ñañó'ó ndidaá tá'an kuu. Dión ná koo.

Ki'o di'a kánian kee na kándisa Jesús

12 ¹ Sa'á ñoo, ñani mií, sa'á ña kú'u ini Ndios sa'a yo, sa'á ñoo seí nda'ávii noo ndo ña nakí'o ndó mií ndó noo Ndios, ta ná kakian ña doko ndo mií ndó noo ná, ta dión kee ndó nani takí ndo, ta ná koo vii ndo, ta ná ndukú ndó ña nata'an ini Ndios koni na ndo'ó, chi k'i'o dión kánian kee ndó kandaño'o ndó na. ² Ná dá'a ka ni koo ini ndo kee ndó tá kée na kúu kuendá ñayuu yó'o. Di'a konó ndó ña ná ndesaá Ndios ñaxintóni ndo, dá kuu kandaá ini ndo ndí kían kóni na kee ndó, dá kasandaá ndo kana'á ndó ndí kían va'a noo ná, ta ndí kían náta'an ini na xiní na, ta ndí kían kúu ña ndaa noo mií ná.

³ Ta sa'á ña ni kemáni Ndios yu'u xí'ín choon kómí, sa'á ñoo xíkaj noo iin rá iin ndó ña ná dá'a ni nakoni téi ndo mií ndó. Va'a kaan chikí'ó va'a ndó ña kée ndó. Ta chikí'ó va'a ndó mií ndó táto'on k'i'o kaa tandéé iní ni xí'o Ndios noo iin rá iin ndó. ⁴ Dá chi ndó'o yó táto'on k'i'o ndó'o yikí koño yo, kua'á nda'o tá'í kían, ta sa díin díin va choon kée iin iian. ⁵ Ta dión ndó'o yó. Kua'a vá kúu yó, tído iin tó'ón vá ni nduu yó sa'á ña kúu yó kuendá Cristo Jesús. Chi ni naki'in tá'an iin rá iin yó, dá ni nduu yó iin tó'ón xí'ín dao ka yo. ⁶ Sa'á ñoo díin díin va choon ni natiin yó noo Ndios, dá katí'a yó kechóon yó noo ná, ta vei ña noo ña maní xí'o na noo yo. Sa'á ñoo tá ni natiin ndó choon ña kían kast'o'on ndó xí'ín dao ka ñayuu to'on ni xí'o Ndios noo ndo, dá kee ndóan táto'on k'i'o kándéé iní ndo mií ná. ⁷ Ta tá ni natiin ndó noo Ndios ña katí'a ndó koni kuáchí ndó noo dao ka na, dá kían koni kuáchí ndísá'ano ndó, o tá ni natiin ndó ña katí'a ndó dána'a ndo, dá kían dána'a va'a ndó. ⁸ Tá ni natiin ndó ña katí'a ndó ka'an ni'ini ndó noo ñayuu, dá kían ka'an ni'ini

ndó noo ná, o tá nī natiin ndó ña kati'a ndó kemáni ndo na kúnda'í, dá kían ndino'o ini ndo kemáni ndo ná, o tá nī natiin ndó ña kati'a ndó kandita ndó noo, dá kían cho'on va'a ini ndo, o tá nī natiin ndó ña kati'a ndó chindeé ndó dao ka na, dá kían chindeé ndó na xí'an kadii iní ndo.

⁹ Ta koo ini ndo ku'u ndisa ini ndo sa'a dao ka ndo. Kañó'ó ndó ndidaá ña kini, ta ndiko ndo ña va'a. ¹⁰ Ku'u sátá'an ini ndo sa'a ndo. Ta táto'on kī'o ndó'o ndó xí'in na ve'e mií ndó, kī'o dión kando'o ndó xí'in dao ka na. Ta koo ini ndo koo ñañó'ó ndó noo iin rá iin ndó. ¹¹ Cho'on ini ndo kechóon ndó, ta o sa kákuu ndó na dusa. Ndino'o ini ndo koni kuáchí ndó noo na kúu sato'o yo. ¹² Kadii ini ndo sa'a tandeé iní xí'o Ndios noo ndo, ta ndeé va'a cháá koo ini ndo tein tandó'ó, ta o sa koo ini ndo katuu ndó ña ká'an ndo xí'in Ndios. ¹³ Ta chindeé ndó dao ka na kúu ñayuu Ndios xí'in ña xínñó'ó ná, ta koo ini ndo natiin va'a ndó na tá kosaa na ve'e ndó.

¹⁴ Ta kaka ndo ña manī noo Ndios sa'a na kéndava'a xí'in ndó, kaka ndo ña manī sa'a ná, ta o sa dátaí chi'an ndó na. ¹⁵ Ta kadii iní ndo xí'in na kadii iní, ta kuaki ndó xí'in na sáki. ¹⁶ Ta iin ná kakuu ndó xí'in dao ka ndo. Ta o sa kúryí ndó, di'a naki'in tá'an ndó xí'in na kúnda'í kandeí ndó. O sa kéndichí téi ndo mií ndó xí'in noo ká'an ndo. ¹⁷ Tá nī kee na ña kini xí'in ndó, o sa nándio kuéi ndó kee ndó ña kini xí'in ná. Di'a ndi'i ini ndo kee ndó ña va'a noo ndidaá ñayuu. ¹⁸ Noo mií ndó ká'an ña ndi'i ini ndo ndukú ndó ña kandeí va'a ndó xí'in iin rá iin ñayuu. ¹⁹ O sa koo ini ndo naki'in ya'i mií ndó sa'a ña kini kée ñayuu xí'in ndó, na manī mií. Di'a kua'an ndo kandati ndó Ndios, dá chi di'a kaá tuti ií mií ná: “Noo yú'u nī ya'a na, ta mií vá yu'u kúu na ndaka kuendá noo ná, kaá sato'o yo Ndios.” ²⁰ Sa'a ñoó, tá kuíko na xiní u'u ñaá, kī'o ndó ña'a ná kasá'an na. Tá íchi ini na, kī'o ndó takuií ná ko'o na, dá chi tá kée ndó dión, dá kían keeá kuendá táto'on ño'ó tikeí nī chikodó ndo diní ná xiní na. ²¹ Ta o sa kónó ndó noo ña kini ña kandeéan dákuei ñaá ndo'ó, di'a chituu ndó ña kini xí'in ña va'a.

13 ¹ Koo ini ndidaá ní ndó kueídó'o ndó ta né'e choon, dá chi ko ndéi ta'on ta né'e choon xí'in ña kóni mií rá, ndéi ra chi kī'o dión nī saki ini mií Ndios. Ta viti ndéi ra chi mií Ndios nī chikaa ini ña kandeí ra. ² Sa'a ñoó, ndidaá na ko kóni kueídó'o ta né'e choon, xío kao na ña sakí mií Ndios, chi mií ná nī chikata ra. Ta na kée dión kúu na ndo'o nío sa'a kuachi kée ná. ³ Dá chi ko ndéi ta'on ta né'e choon dáyuu'ú ra na kée ña va'a. Di'a ndéi ra dáyuu'ú ra na kée ña kini. Tá ko kóni ndo kayu'ú ndo ta né'e choon, dá kían kee ndó ña va'a, dá ná ka'an va'a ra sa'a ndo. ⁴ Dá chi kómí rá choon noo Ndios, dá kían kandeí va'a ndó. Tído tá kée ndó ña kini, kánian yu'ú ndo, dá chi ko né'e oon ta'on ra espada. Ta kómí rá choon noo Ndios ña kían dándó'o ra nío ndidaá na kée ña kini. ⁵ Sa'a ñoó kánian kueídó'o ndó ra, ta o duú sava'a sa'a ña

kómí rá choon dándó'o ra nío yo. Di'a ná kueídó'o ndó ra sa'á ña kóni ndo kakomí ndó iin ñaxintóni vii. ⁶ Sa'á ñoó chiya'i ndó sa'a ñó'o ndo noo rá, chi kómí rá choon noo Ndios, ta sava'a choon yó'o kuití vá ndéi ra. ⁷ Ta chiya'i ndó noo iin rá iin ra kánian chiya'i ndó, ta kíán noó ta né'e choon, o kíán noó ra kí'in ya'i sa'a ñó'o. Ta kí'o ndó ñañó'ó noó na kánian natiin ñañó'ó, ta nakoni ndo na kánian nakoni ndo.

⁸ Ni lú'u o sa kátai ndo noo ni iin ñayuu, sava'a ña katai ndo noo ná ná kakuu ña ku'u ini ndo sa'a ná. Dá chi tá kú'u ini ndo sa'á ñayuu xí'in ndó, dá kíán kéndisa ndó choon sa'ándá ley Moisés. ⁹ Dá chi di'a kaá ley: “O sa kée ndó kuachi xí'in na ko kúú ñadi'í ndo o yíi ndo, o sa ka'ání ndo ndii, o sa kí'in kuí'íná ndó, o sa káva'a ndó ña to'on sa'a dao ka na, o sa kátóo ndo kakomí ndó ña'a ió noo dao ka ñayuu.” Ta choon yó'o xí'in dao ka choon sa'ándá ley, iin nóo kúú váán xí'in ña kú'u ini yo sa'á ñayuu xí'in yó táto'on kí'o ndó'o yó xí'in mií yó. ¹⁰ Dá chi tá ná ku'u ini yo sa'a ñayuu xí'in yó, dá kíán ni iin kuu ta'on o kéndava'a yó xí'in ná. Sa'á ñoó tá ná ku'u ini yo sa'a ná, dá kíán kéndisa yó choon sa'ándá ley. ¹¹ Dión koo ini ndo, dá chi sa kua'an ndi'i va tiempo. Sa ni kasandaá va hora ndoto ndó, ná dá'a ka ni kudí ndo, dá chi sa kuyati cháa ka kuu nandió ko na dá'akí ñaá o duú tá míi ni kasá'a yó kándisa yó na. ¹² Sa ndikí vá kíán viti, sa kua'an tuu noo vá. Ná dánkoo yó ndidaá ña kini kée na xionoo noo iin naá. Ta ná tiin yó to'on ndato Ndios, dá kandeé yó naá yo xí'in ña kini. ¹³ Ná kee yó táto'on kée na ió ndúsá'ano ini, tá'an na xionoo noo túu. Ná dá'a ni kee yó víko xíi kua'an, ná dá'a ni kakuu yó na xí'i, ná dá'a ni kudí yo xí'in ñayuu yó'o, ñayuu káa, ná dá'a ni kee yó kuachi ka'an noo xí'in ñii yo, ná dá'a ni ndukú yó tandó'ó xí'in dao ka na, ta ná dá'a ni koo u'u ini yo. ¹⁴ Di'a Jesucristo, na kúú sato'o yo, ná kakuu táto'on iin dá'on kandixi ndó, ta o sa kí'o ndó mií ndó ña kíán kee ndó ña kóni ñii ndo.

Ká'an Pablo sa'á na kómani kua'ano xí'in to'on Ndios

14 ¹ Natiin va'a ndó ñani yo, na kómani kua'ano xí'in ña ndaa kándisa yó, ta o sa chídáó tá'an ndó xí'in ná. ² Chi ndéi dao ñani yo, na ná'á ña kuu keí ná ndi ndáa mií ña'a. Tído ndéi ta'ani dao ka ñani yo, na ko kátóni va'a ini, sava'a ña'a kuí va seí na. ³ Ta ndo'ó, na ko ná'ani kuáchi ini keí ndi ndáa mií ña'a, o sa kénóo ndó na ko seí ña. Ta ndo'ó, na ko seí ndi ndáa mií ña'a, ná dá'a ni dá'ana ndá'a ndo na seí ña, dá chi sa ni natiin va'a ñaá Ndios. ⁴ Ta, ¿ndá yoo kúú ndó, ká'án ndó? ¿Ndiva'a chindaá noo ndo keyíko ndo sa'á na ko ñó'o tixi ndá'a ndo? Chi mií Ndios, na kúú sato'o ñani ndo, noón kúú na keyíko sa'a ná, á iin ndaa na o ni kankao na noó kuachi. Tído o kankao ta'on na, dá chi sato'o yo Ndios, ká'ano nda'o choon né'e na, ta kuu chindeé ñaá ná kuiin ndaa na.

⁵ Ió dao ñani yo kéká'ano ij vá ná dao kuu, ta ió dao ka ñani yo ko kéká'ano ka na ni iin tó'ón kuu. Sa'á ñoó iin rá iin mií vá ndó kánian nakani va'a ini sa'á ndí kían kee ndó sa'a ña yó'o. ⁶ Dá chí ió dao ñani yo kéká'ano na dao kuu, ta dión kée na dá chí ndúkú ná k'i'o na ñañó'ó noo Ndios. Ta dao ka ñani yo ko kéká'ano ka na ni iin tó'ón kuu, chí k'i'o dión kándaá ini na, ta xí'o ta'ani na ñañó'ó noo Ndios. Ta dión ni ndó'o ñani yo, na seí ndi ndáa mií ña'a, náki'o na ñañó'ó noo Ndios, dá chí náki'o na ndivé'e noo ná sa'a ndidaá ña seí na. Ta dión ta'ani ñayuu ko seí ndi ndáa mií ña'a, ndúkú ná nak'i'o na ñañó'ó noo Ndios sa'á ña ko seí na ndi ndáa mií ña'a, ta náki'o ta'ani na ndivé'e noo Ndios sa'á ña kúu seí na. ⁷ Chí ko ndéi mií ta'on yó xí'an dión oon ni, ta ni ko xí'i yo xí'an dión oon ni. ⁸ Dá chí tá takí yo, noo ndá'a sato'o yo Ndios ndéi yó. Ta tá ni xi'i yo, noo ndá'a sato'o yo Ndios vá ni xi'i yo. Sa'á ñoó, tá takí yo o ni xi'i yo, noo ndá'a sato'o yo Ndios vá ñó'o yó. ⁹ Ni xi'i Cristo, ta ni nataki na, dión, dá ni xinkoo na kakuu na sato'o noo na ni xi'i xí'in noo na ndéi takí.

¹⁰ Tído ndo'ó, ¿ndiva'a dána'a ndá'a ndo ñani ndo? Ta, ¿ndiva'a kénóo ndó ñani ndo? Chí ndidaá vá yó nakuíta noo Cristo keyíko sa'a yo. ¹¹ Dá chí di'a kaá tuti ij Ndios:

Sa'á ña takí yu'u, kaá sato'o yo Ndios,
 sa'á ñoó ká'in xí'in ndó ña mián nata'anō ndidaá kúú kondo ñayuu
 noo yú'u,
 ta ndidaá kúú yú'u nakoni ña yu'u kúú Ndios.

¹² Sa'á ñoó kándaá iniō ña iin rá iin vá yó nakuíta naki'o yó kuendá noo Ndios.

Ná o kée yó ni iin ña'a, ña kían kedaá xí'in ñani yo, dá kuei na noo kuachi

¹³ Sa'á ñoó ná dá'a ni dána'a ndá'a tá'an yó. Di'a koo ini ndo ná dá'a ni kakuu ndó tátō'on iin yuu noo kachi'i sá'a ñani ndo, dá ya'a na kee na kuachi. ¹⁴ Ná'a yu'u, ta kándéé ká'ano ini sato'o yo Jesús ña ni iin tó'ón ña'a seí yo ko kúú ña'a yakó noo Ndios. Tído tá ká'an dao ka ñani yo ña kían ña'a yakó noo Ndios, dá kían ñaá vá kían noo mií ná. ¹⁵ Ta tá ña seí ndo kedaá xí'in ñani ndo, dá nakani kuáchi ini na, dá kían ko kú'u ta'on ini ndo sa'a ná. Kana'a ndó ña ni xi'i Cristo sa'a ñani ndo, sa'á ñoó ná dá'a ni dátúú ndó na xí'in ña seí ndo. ¹⁶ O sa k'i'o ndó mií ndó ña ka'an ndava'a na sa'a ña kée ndó, va'ará ná'a mií ndó ña kían ña va'a. ¹⁷ Dá chí yóó, na ñó'o tixi ndá'a Ndios, ko káni kaan ndi'i ini yo sa'a ña seí yo ni sa'a ña ko'o yó. Ña kánian ndi'i cháa ka ini yo sa'a kían ña ná koo ini yo kee yó ña ndaa, ta ná kandeí va'a yó xí'in dao ka ñani yo, ta ná kandeí dii iní yo, chí ndidaá ña yó'o vei noo Espíritu ij Ndios. ¹⁸ Ta na xínkuáchí noo Jesús kúú na kée ndidaá ña yó'o, ta náta'an ini Ndios sa'a ña kée na, ta ká'an va'a dao ka ñayuu sa'a ná.

¹⁹ Sa'á ñoó ná ndukú yó ndi keeá kandeí va'a yó xí'ín dao ka ñayuu, ta ná ndukú yó ndi keeá dákuá'ano tá'an yó íchì Ndios. ²⁰ Ta ná dá'a ni danaá ndo ña ni kee Ndios xí'ín ña'a seí ndo. Ndidaá tá'an va ña'a seí yo kúú ña vii. Tído ko vá'a ta'on kíán noo Ndios tá ná kì'o yó ña kankao ñani yo noó kuachi sa'á ña seí yo. ²¹ Iin ña va'a cháá ka kíán tá ná o keí yo koño, ta ná o kó'o yó vino, ta ná o kée yó dao ka ña'a, ña kíán kédaá xí'ín ñani yo, dá kuei na noó kuachi, o ña'a kédaá xí'ín ná nakani kuáchì ini na, o ña'a kédaá xí'ín ná ndiko na noó ña'a Ndios. ²² ¿Á kándisa ndó ña kuu keí ndo ndidaá ña yó'o? Va'a va, tído mií ndó xí'ín Ndios ná kana'á. Ndiká'an ví na ko nákanì kuáchì ini noó ña kée na. ²³ Chì ndi ndáa mií ñayuu nákanì kuáchì ini keí ná iin ña'a, ta seí iì vá náan, noón kúú na táì kuachi noo Ndios, dá chì kándisa na ña ko kánian kee na dión. Dá chì tá ná kandisa yó ña kíán iin ña ko vá'a, ta ni kee yóan, dá kíán ni ya'a yó ni kee yó kuachi noo Ndios.

15 ¹ Sa'á ñoó, yóó, na ndíta toon xí'ín to'on Ndios, kánian kì'o ndeé ini yo sa'a ñani yo, na kómanì kua'ano xí'ín to'on Ndios. Ná dá'a ni kee yó sa'a mií, ná kee cháá ka yo sa'a ñani yo. ² Ta ná koo ini iin rá iin yó ndukú yó ña nata'an ini ñani yo, ta ná ndukú yó ña keva'a na, dión, dá koni na kua'ano cháá ka na xí'ín to'on Ndios. ³ Chì ni Cristo ko ní ndúkú ná ña kíán kee na sa'a mií ná. Di'a ni kee na táto'on kì'o ká'an tuti iì Ndios: “Mií to'on kini ni ka'an na sa'a mií ní, ñoó kíán ni nakuido yu'u.” ⁴ Ta ndidaá to'on ni taa na noo tuti iì Ndios tá sata, ñoó kíán dána'an noo yo nda viti, dá ná katì'a yó kandati kueé yo, ta ná koo ndeé ini yo kee to'on ñoó, dá koni yo natiin yó tandéé iní noo Ndios. ⁵ Ta mií Ndios kúú na xí'o ña kandati kueé yo, ta xí'o na tandéé iní noo yo, noón kúú na kì'o ña kandeí ñóchí ndó xí'ín iin rá iin ndó táto'on kì'o kóni mií Cristo Jesús. ⁶ Dión, dá iin ná kakuu ndó keká'ano ndó Ndios, na kúú tatá sato'o yo Jesucristo.

Miían dána'a yo to'on Jesús noo ndidaá na ko kúú na Israel

⁷ Sa'á ñoó koo ini ndo natiin va'a ndó iin rá iin ndó táto'on kì'o ni natiin va'a Cristo mií yó, dá ná natiin Ndios ñañó'ó. ⁸ Ta ká'in xí'ín ndó ña ni kii Cristo ni xinkuáchì di'a na noó na ñoo Israel, dá na'a na ña iin na ndaa kúú Ndios, dá dáxinkoo na ña ni kaa Ndios kee na xí'ín na sá'ano Israel ni sa ndei sa na'á. ⁹ Ta ni kii ta'ani Cristo, dá ná keká'ano na ko kúú na Israel Ndios sa'á ña kú'u ini na sa'a ná. Dá chì di'a kaá tuti iì Ndios:

Ta viti ko'in kì'oi ñañó'ó noo mií ní tein na ko kúú na Israel,
ta kata yu'u yaa keká'anoi kuu mií ní.

¹⁰ Ta kaá ta'ani tuti iì Ndios di'a:

Kadii dáó ini ndo'ó, na ko kúú na Israel, xí'ín na Israel, na kúú na ñoo Ndios.

¹¹ Ta kaá ta'ani tuti iì Ndios di'a:

Ta ndo'ó, na ko kúú na Israel, keká'ano ndó Ndios, na kúú sato'o yo, ta ndidaá ñoo ná chindaya'i ñaá ná.

¹² Ta kaá ta'ani profeta Isaías:

Tein na ve'e taa naní Isaí kana iin taa, ta kasandaá na dándáki na na ko kúú na Israel, ta noón kúú na ki'o tandeé iní noo ná.

¹³ Ta mií Ndios, na xí'lo tandeé iní noo yo, ná dákútí ná nío ndo xí'ín ña kádij iní ndo, ta ná ki'o na ña koo va'a ini ndo sa'á ña kándéé iní ndo ná, dá ná nakutí iin rá iin ndó xí'ín tandeé iní kee Espíritu ij.

¹⁴ Ta ná'á vá yu'u ña va'a nda'o ini ndo'ó, ñani mií, ta ni chití ndó xí'ín ñaxintóni kée Ndios, sa'á ñoó ti'a ndó ka'an ni'ini noo sátá'an ndó.

¹⁵ Tído noo tuti yó'o ni xi'o ndeé ini ni ka'in xí'ín ndó, dá dándusaa ini ndo'ó sa'a dao ka ña'a, ta dión ni keei, chi mií Ndios ni kemáni yu'u xí'ín choon yó'o, ¹⁶ dá kechóoin noo Jesucristo tein na ko kúú na Israel, dá dána'i to'on va'a sa'a Jesús noo ná, dá kakuu na iin ña va'a dokoí noo Ndios, dá chi Espíritu ij Ndios kúú na ndúvii ñaá. ¹⁷ Ta sa'á Cristo Jesús náta'an ini sa'a choon kéei noo Ndios. ¹⁸ Chi ká'in sava'a sa'á ña ni kee Cristo xí'ín ndá'í tein na ko kúú na Israel, chi seídó'o na Ndios ni kee ña dána'i, xí'ín ña kéei. ¹⁹ Chi ni keei ña ná'ano xí'ín ña ndato xí'ín ndeé Espíritu ij Ndios. Sa'á ñoó nda ñoo Jerusalén, ta nda iin ní kuendá Ilírico di'a ni naka'ani to'on va'a sa'a Cristo Jesús ni keei. ²⁰ Ta daá ndí'i va ini dána'i to'on va'a sa'a Cristo Jesús noo na ko ñá'a kuií kueídó'o ñaá, dá ná o náki'in ñe'i choon ni kee dao ka na dána'a. ²¹ Dá chi ndí'i ini keei tátoto'on ká'an tuti ij Ndios:

Tá'an ñayuu ko ñá'a kuií ni'i tó'on sa'a Ndios, noón kúú na katóni ini, ta ñayuu ko ñá'a kuií kueídó'o sa'a ná, kandaá ini na.

Chíkaa ini Pablo ko'on na ñoo Roma

²² Sa'á ñoó ko ní kúú saai noo ndéi ndó, va'ará kua'á nda'o ta'ándá ni ka'in saai kooi xí'ín ndó. ²³ Tído viti sa ni náta'an va yu'u iin ní kuendá noo nákaaí yó'o ni daná'i. Ta sa kua'a vá kua nákani ini saai noo ndéi ndó. ²⁴ Sa'á ñoó tá ná ko'in España, dá chika'andaj noo ndéi ndó koo tooi xí'ín ndó. Ta kandatii ña chindeé ndó yu'u noo ko'in tá ni ndi'i ni sa io dii tooi xí'ín ndó. ²⁵ Tído viti kían ko'in ñoo Jerusalén, dá kemáni yu'u na kúú ñayuu Ndios ndéi ñoo, ²⁶ dá chi na kúú kuendá Jesús ndéi chí kuendá Macedonia xí'ín na ndéi Acaya ni náta'an ini na ni ketutí ná cháa di'ón kemáni ná na kúnda'í ñó'o tein na kúú ñayuu Ndios ndéi ñoo Jerusalén. ²⁷ Ta ni náta'an ini na kee na dión, dá chi táj na noo na Israel, chi ni ni'i ná ña maní noo Ndios sa'á na Israel. Sa'á ñoó kánian chindeé ñaá ná xí'ín ña va'a ió noo ná. ²⁸ Tá ni ndi'i ni keyíkoj choon yó'o ni sa'in ni ne'i di'ón ñoó noo ná, dá chika'andaj noo ndéi ndó xaan noo ya'i ko'in España. ²⁹ Ta kátóni ini ña tá ná saai noo ndéi ndó xaan,

kua'á nda'o ña va'a kee Cristo xí'ín yó sa'á ña kándisa yó to'on va'a sa'a ná.

³⁰ Tído xíkaj ña maní noo ndo, ñani, ña sa'á ña kándisa yó Jesucristo, na kúu sato'o yo, xí'ín sa'á ña kú'u sátá'an ini yo sa'a yo kée Espíritu ii Ndios, ña chindeé ndó yu'u kaka ndo ña maní noo Ndios sa'í, ³¹ dá ná chindeé ná yu'u noó taa ko xí'ín kándisa to'on va'a Jesús ndéi chí kuendá Judea. Ta kaka ta'ani ndó noo ná ña ná natiin va'a na kúu kuendá Jesús ndéi ñoo Jerusalén di'on ko'in dánkooi noo ná. ³² Dá kían ná saaj xí'an kádii inii noo ndéi ndó tá dión kóni mií Ndios, dá ná nani'i ndée yu'u xí'ín ndó. ³³ Ná koo Ndios, na xí'o ña koo va'a ini yo, xí'ín iin rá iin ndo'ó. Dión ná koo.

Ka'an Pablo ndisá'an xí'ín ñayuu né'e tá'an va'a xí'ín ná

16 ¹ Natiin va'a ndó k'i'o yó Febe, chí kosaa na noo ndéi ndó. Mií ná kúu na xínkuáchí noo na kúu kuendá Jesús ndéi chí ñoo Cencrea. ² Ta kónii ña kían natiin va'a ndó na, chí kúu ná kuendá sato'o yo Jesús, chí k'i'o dión kánian kee yó sa'á ña kúu yó ñayuu Ndios. Ta chindeé ndó na xí'ín ndidaá ña'a xínñó'ó ná, chí chindeé ná dao ka na kúu kuendá Jesús, ta chindeé ta'ani na yu'u.

³ Ta ka'an ndo ndisá'an xí'ín Priscila, xí'ín Aquila, na kéchóon dáó xí'ín yu'u noo Cristo Jesús. ⁴ Ta ni xi'o na mií ná ña kuu na sa'a yú'u, dá kakii. Ta o duú iin tó'on yu'u ní náki'o ndivé'e noo ná, dión ta'ani na kúu kuendá Jesús, na ko kúu na Israel, náki'o ta'ani na ndivé'e noo ná. ⁵ Ta ka'an ta'ani ndó ndisá'an xí'ín na kúu kuendá Jesús ndítútí ve'e na.

Ta ka'an ta'ani ndó ndisá'an xí'ín ñani manii Epeneto, na mií noo ni kándisa to'on Jesús chí kuendá Acaya di'a.

⁶ Ta ka'an ndo ndisá'an xí'ín k'i'o yó María. Na yó'o kúu na ndí'i nda'o ini xínkuáchí noo Ndios tein mií ndó xaan.

⁷ Ta ka'an ndo ndisá'an xí'ín ñani yo Andrónico xí'ín ñani yo Junias, tá'an ra kúu tá'an yu'u, ta ndi nduú ra ni sa ño'o xí'ín ve'e kaa sa'á to'on Jesús. Ta ka'an va'a apóstol, na né'e to'on Jesús, sa'a ndi nduú taa yó'o. Ta sa daá kándisa va ra Jesús, dá ni kándisa yu'u.

⁸ Ta ka'an ndo ndisá'an xí'ín ñani yo Amplias, ra kúu ñani maní mií sa'á ña kándisa dáó ndú sato'o yo Jesús.

⁹ Ta ka'an ndo ndisá'an xí'ín ñani yo Urbano, ra kéchóon dáó xí'ín ndu'u noo Cristo Jesús. Ta ka'an ndo ndisá'an xí'ín ñani manii Estaquis.

¹⁰ Ta ka'an ndo ndisá'an xí'ín ñani yo Apeles, ta náta'an ini Cristo xiní ñaá ná. Ta ka'an ndo ndisá'an xí'ín na ve'e ñani yo Aristóbulo.

¹¹ Ta ka'an ndo ndisá'an xí'ín tá'in naní Herodión. Ta ka'an ndo ndisá'an xí'ín na ve'e Narciso, tá'an na ndíta ndaa xí'ín sato'o yo Jesús.

¹² Ta ka'an ndo ndisá'an xí'ín k'i'o yó Trifena xí'ín k'i'o yó Trifosa, tá'an na kéchóon noo sato'o yo Jesús. Ta ka'an ndo ndisá'an xí'ín k'i'o maní yo Pérsida, tá'an na ndí'i ini kéchóon noo sato'o yo Jesús.

¹³ Ta ka'an ndo ndisá'án xí'ín ñani yo Rufo, ra ni kaxi mií sato'o yo Jesús. Ta ka'an ta'ani ndó ndisá'án xí'ín naná ra, chi táto'on kị'o naná mií kúu ná, xiní.

¹⁴ Ta ka'an ndo ndisá'án xí'ín ñani yo Asíncrito, xí'ín Flegonte, xí'ín Hermas, xí'ín Patrobas, xí'ín Hermes xí'ín dao ka na kúu kuendá Jesús dákuá'a xí'ín rá.

¹⁵ Ta ka'an ndo ndisá'án xí'ín ñani yo Filólogo, xí'ín kị'o yó Julia, xí'ín ñani yo Nereo, xí'ín kị'o ra, xí'ín kị'o yó Olimpás xí'ín ndidaá ka ñayuu Ndios dákuá'a xí'ín ná.

¹⁶ Ta viti chitó tá'an ndó noo ndo, ta ña yó'o ná kakuu iin ñañó'ó ka'an tá'an ndó ndisá'án sa'á ña kúu ndó kuendá Jesús. Ta natiin ndó ndisá'án ká'an ndidaá na kúu kuendá Cristo ndéi iin rá iin xían.

¹⁷ Ta seí nda'avíi noo ndo, ñani, ña kaon koo ndó xí'ín ra kátoó ka'anda tá'an ñaá, tá'an ra kátoó dátúú ña ndaa kándisa ndó. Va'a kaan taó xóo ndó mií ndó noo rá. ¹⁸ Dá chi taa yó'o kúu ra ko xínkuáchí ta'on noo sato'o yo Jesucristo, savá'a sa'a mií vá rá kée ra. Ta xí'ín to'on vitá xí'ín to'on ñóchí dándá'í ra na vitá ini.

¹⁹ Ta ndéi kúu mií vá ká'an na sa'a ndo ña kúu ndó ñayuu seídó'o ndaa to'on Jesús, sa'á ñoó kádii nda'o ini sa'á ña kée ndó dión. Ta kóni yu'u ña ndichí koo ndó noo ña ndaa, ta o sa ndíko ndo ña kini. ²⁰ Ta Ndios, na xí'o ña koo va'a ini yo, noón kúu na kadi yachi ña u'u tixi sa'a ndo. Ta ná koo ña maní xí'o Jesucristo, na kúu sato'o yo, xí'ín iin rá iin ndó.

²¹ Ta tánda'á ta'ani ñani yo Timoteo, ta kéchóon nduú xí'ín yu'u, ndisá'án kosaa noo ndo. Tá'an ra kúu tá'in naní Lucio, xí'ín Jasón, xí'ín Sosípater, tánda'á ta'ani ra ndisá'án kosaa noo ndo.

²² Ta yu'u, ra naní Tercio, ni taai tuti yó'o kosaa noo ndo. Ta tánda'á ta'ani yu'u ndisá'án kosaa noo ndo, chi kándisa dáó yó sato'o yo Jesús.

²³ Ta ká'an ta'ani ñani yo Gayo ndisá'án xí'ín ndó. Roón kúu ra ni natiin va'a yu'u ve'e ra, ta dión ta'ani kée ra xí'ín ndidaá ka na kúu kuendá Jesús. Ta ká'an ta'ani ñani yo Erasto, ta né'e va'a di'ón ñoo yó'o, ndisá'án xí'ín ndó. Ta ká'an ta'ani ñani yo Cuarto ndisá'án xí'ín ndó.

²⁴ Ná koo ña maní xí'o Jesucristo, na kúu sato'o yo, xí'ín iin rá iin ndó. Dión ná koo.

Ki'o di'a dándí'i Pablo to'on ká'an na noo tuti yó'o

²⁵ Ió choon noo ndá'a Ndios ña kendakí ná ndo'ó xí'ín to'on va'a dána'i sa'a Jesucristo. Ta to'on va'a yó'o kúu mií mií ña ni na'a Ndios noo yo, tá'an ña ni sa káa de'é nda rá ko ñá'a kava'a ñayuú yó'o. ²⁶ Tído viti kían ni na'a na ña noo yo. Ta ni taa profeta ña noo tuti ii Ndios táto'on kị'o ni sa'anda Ndios, na daá ió kuií, choon noo ná kee na. Ta viti ni dasa to'on sa'án noo ndidaá ñayuu, dá ná kandisa naan, ta ná kee na choon sa'ándáan. ²⁷ Sa'á ñoó ná natiin na kúu iin tó'on dini Ndios, na kúu Ndios ndichí, ñañó'ó sa'a Jesucristo ndidaá tá'an ku. Dión ná koo.